



PARLAMENTO
DE GALICIA



BOLETÍN OFICIAL DO PARLAMENTO DE GALICIA

XII lexislatura
Número 290
26 de novembro de 2025

Fascículo 3



SUMARIO

1. Procedementos parlamentarios

1.1. Procedementos de natureza normativa

1.1.2. Propostas de normas

1.1.2.1. Proxectos e proposicións de lei

1.1.2.1.1. Proxectos de lei

■ Informe da Ponencia sobre o proxecto de lei de protección da saúde das persoas menores e prevención das condutas adictivas [138455](#)

■ Acordo da Mesa do Parlamento, do 25 de novembro de 2025, polo que se admite a trámite o proxecto de lei de modificación da Lei 8/2008, do 10 de xullo, de saúde de Galicia, pola que se establecen medidas de prevención e protección integral contra a violencia no Sistema de saúde de Galicia, e se abre o prazo de presentación de emendas [138504](#) [138506](#)



1. Procedementos parlamentarios

1.1. Procedementos de natureza normativa

1.1.2. Propostas de normas

1.1.2.1. Proxectos e proposicións de lei

1.1.2.1.1. Proxectos de lei

Informe da Ponencia sobre o proxecto de lei de protección da saúde das persoas menores e prevención das condutas adictivas

De conformidade co disposto nos artigos 65 e concordantes do Regulamento da Cámara, ordénase a publicación no *Boletín Oficial do Parlamento de Galicia* do Informe da Ponencia sobre o proxecto de lei de protección da saúde das persoas menores e prevención das condutas adictivas.

Santiago de Compostela, 25 de novembro de 2025

Miguel Ángel Santalices Vieira

Presidente

Informe da Ponencia sobre o proxecto de lei de protección da saúde das persoas menores e prevención das condutas adictivas

A Ponencia designada pola Comisión 5ª, Sanidade, Política Social e Emprego, para emitir informe sobre o proxecto de lei de protección da saúde das persoas menores e prevención das condutas adictivas, na reunión e cos acordos que a seguir se indican, á vista do texto do proxecto e das emendas presentadas ao seu articulado, elaborou, para o seu debate perante o dito órgano, este informe.

INFORME

1. Antecedentes

1.1. O proxecto de lei tivo entrada no Rexistro do Parlamento o día 12 de setembro de 2025, co número de rexistro 33820.

1.2. A Mesa do Parlamento, na reunión do 16 de setembro de 2025, dispuxo a súa publicación no *Boletín Oficial do Parlamento de Galicia* (BOPG núm. 256, do 17 de setembro de 2025), e a apertura do prazo de presentación de emendas, que rematou o 4 e o 22 de outubro de 2025 para as emendas á totalidade e ao articulado (cuarta prórroga), respectivamente. Así mesmo, oída a Xunta de Portavoces, acordou a súa tramitación pola Comisión 5ª, Sanidade, Política Social e Emprego.

1.3. A emenda á totalidade e as emendas ao articulado presentadas —cualificadas pola Mesa da Comisión nas sesións do 6 e 27 de outubro de 2025, e publicadas no BOPG núm. 266 e 275, do 9 e do 28 de outubro de 2025, respectivamente— foron:

— Unha emenda á totalidade, de devolución, do G. P. do Bloque Nacionalista Galego (doc. núm. 35617).



— Cento unha emendas ao articulado: trinta e nove do G. P. do Bloque Nacionalista Galego (doc. núm. 37492), sesenta do G. P. Socialista de Galicia (doc. núm. 37505) e dúas do G. P. Popular de Galicia (doc. núm. 37507).

1.4. Na sesión plenaria do 14 de outubro de 2025 rexeitouse a emenda á totalidade de devolución precitada.

2. Composición, constitución e reunións da Ponencia

2.1. Composición e constitución da Ponencia

A Comisión 5ª, Sanidade, Política Social e Emprego, na sesión do 30 de outubro de 2025, designou os seguintes ponentes:

— Polo G. P. Popular de Galicia: María Encarnación Amigo Díaz (titular) e María Dolores Hermelo Piñeiro (suplente).

— Polo G. P. do Bloque Nacionalista Galego: María Montserrat Prado Cores (titular) e Iria Carreira Pazos (suplente).

— Polo G. P. Socialista de Galicia: María Elena Espinosa Mangana (titular) e Silvia Longueira Castro (suplente).

— Polo G. P. Mixto: Armando Ojea Bouzo (titular).

2.2. Reunións da Ponencia

A sesión constitutiva da Ponencia tivo lugar o 30 de outubro de 2025, coa presenza da vicepresidenta da Comisión 5ª, Sanidade, Política Social e Emprego, Ethel María Vázquez Mourelle, e coa asistencia das ponentes e do ponente titulares: María Encarnación Amigo Díaz, María Montserrat Prado Cores, María Elena Espinosa Mangana e Armando Ojea Bouzo.

Nas seguintes reunións, que tiveron lugar os días 5 e 11 de novembro, coa asistencia das ponentes e do ponente titulares, e o día 18 de novembro, coa asistencia das ponentes e do ponente: María Encarnación Amigo Díaz, Iria Carreira Pazos, María Elena Espinosa Mangana e Armando Ojea Bouzo, estudaron as propostas de aceptación de emendas e de transaccións.

Por último, na derradeira reunión, que tivo lugar o 20 de novembro, coa asistencia das ponentes e do ponente titulares, concluíron o informe coas recomendacións definitivas desta ponencia.

3. Elaboración do informe

Como resumo sucinto do seu labor, a Ponencia recoméndalle á Comisión a aceptación das emendas números 1 e 2 do G. P. Popular de Galicia.

Por último, respecto das emendas dos GG.PP. Socialista de Galicia e do Bloque Nacionalista Galego, a ponente do G. P. Popular de Galicia recoméndalle á Comisión o seu rexeitamento.



4. *Texto articulado do Proxecto de lei de protección da saúde das persoas menores e prevención das condutas adictivas*

EXPOSICIÓN DE MOTIVOS

I

A protección da infancia, consagrada como principio reitor no artigo 39.4 da Constitución española, constitúe un pilar fundamental para construír unha sociedade saudable, equitativa e con oportunidades para o desenvolvemento integral das persoas. Por iso, é necesario potenciar unha educación social especialmente orientada á saúde da infancia e da adolescencia, así como promover a educación sanitaria, o fomento de estilos de vida saudables e a adecuada utilización do tempo de lecer.

O consumo de substancias psicoactivas e as adicións sen substancia representan un problema de saúde pública de primeira magnitude, que afectan especialmente as persoas menores de idade polo seu maior risco e vulnerabilidade e o grave impacto que estas condutas teñen na súa saúde física e mental e no seu desenvolvemento educativo, social e persoal, con repercusións prolongadas no tempo.

Neste sentido, o consumo de alcohol está relacionado con diferentes problemas da saúde (enfermidades hepáticas, cardiovasculares, neurolóxicas, etc.), problemas familiares (deterioración das relacións familiares e/ou de parella, violencia doméstica, etc.), problemas económicos e sociais (multas, accidentes de tráfico, etc.) e problemas laborais (accidentes laborais, diminución do rendemento, etc.).

No referente ao tabaco, a Organización Mundial da Saúde sinala o seu consumo como a primeira causa de mortalidade evitable e advirte que calquera nivel de exposición pasiva é prexudicial para a saúde. O tabaco é o principal factor de risco asociado a diversas enfermidades graves, incluíndo múltiples tipos de cancro e enfermidades cardiovasculares e respiratorias. Ademais, afecta a fertilidade e incrementa os riscos durante o embarazo e para o neonato.

Os dispositivos susceptibles de liberación de nicotina (en diante, DSLN), incluídos os cigarros electrónicos ou vapeadores, carecen de evidencia científica concluínte sobre a súa eficacia para deixar de fumar. Conteñen substancias nocivas, incluídos compostos canceríxenos, e o seu uso, especialmente entre a mocidade, supón riscos para a saúde individual e colectiva. Por iso, equipáranse aos produtos do tabaco e aplícanse as mesmas restricións para a súa regulación e control.

O cánnabis, pola súa banda, é a substancia psicoactiva ilegal máis consumida entre as persoas novas. O seu consumo é especialmente prexudicial en idades temperás, cando o organismo está en fase de maduración, provocando cambios neurobiolóxicos durante este período. Pode provocar alteracións dos sentidos e da percepción do tempo, cambios no estado de ánimo, descoordinación motora, dificultade para pensar e resolver problemas, alteracións nos procesos de memoria, alucinacións, delirios e, nalgúns casos, sintomatoloxía psicótica.

As bebidas enerxéticas constitúen un conxunto heteroxéneo de bebidas sen alcohol que conteñen estimulantes, como a cafeína, en cantidades que poden ser excesivas para persoas menores de



idade. Estes produtos, cuxo consumo en aumento na mocidade galega resulta preocupante, provocan efectos adversos tanto na saúde física como na mental, como alteracións do sono e trastornos cardiovasculares e psicolóxicos. Institucións internacionais como a Food Drug Administration e a Academia Americana de Pediatría recomendan evitar o seu consumo en menores, o que xustifica a necesidade dunha regulación específica.

En Galicia, o consumo de alcohol, tabaco e cánnabis entre a poboación adulta e xuvenil segue sendo prevalente, con datos que mostran un consumo significativo e preocupante entre a mocidade. O incremento recente do consumo de bebidas enerxéticas en adolescentes alerta sobre a urxencia de intervencións normativas específicas. Este problema require unha resposta integral e coordinada que integre accións educativas, preventivas e de control do acceso a estas substancias nocivas, especialmente en colectivos vulnerables e persoas menores de idade.

Non debemos esquecer que, debido á maior accesibilidade das tecnoloxías da información, dos dispositivos móbiles e dos soportes conectados, está a producirse un conxunto de problemas na poboación (especialmente na máis nova) que, aínda que non teñen unha definición estándar na literatura científica, teñen moitas semellanzas coas adicións a substancias. E, ao igual que sucede con estas, así como co xogo patolóxico, o uso non axeitado das tecnoloxías dixitais, dos dispositivos móbiles e dos soportes conectados pode levar ao fracaso escolar, á perda do traballo e a problemas de relacións interpersoais de diversa gravidade, xa que o comportamento desadaptativo tende a desprazar as actividades sociais, familiares e académicas ou laborais normais.

Así mesmo, a Comunidade Autónoma de Galicia exerce plenamente as súas competencias na materia de saúde pública, sanidade, lecer e espectáculos públicos, segundo o Estatuto de autonomía e a normativa complementaria. Neste marco, esta lei constitúe un instrumento normativo actualizado, coherente, integral e adaptado á realidade social actual, co obxecto de avanzar na prevención e na asistencia das problemáticas adictivas.

A prevención é unha das claves que dará soporte aos cambios que se perseguen. Hoxe en día dispónse de respostas tecnicamente coherentes e eficaces, baseadas na evidencia científica, que permiten evitar o inicio do consumo de substancias psicoactivas, atrasar a idade na que se producen os primeiros consumos, impedir a escalada no seu uso e reducir os riscos e danos que supoñen certos patróns de uso. Por este motivo, esta lei revisa os principios que deben guiar a prevención escolar, familiar e comunitaria que se levará a cabo en Galicia e a adopción de estilos de vida saudables, potenciando diversos factores de protección e reducindo o impacto de determinados factores de risco asociados aos trastornos adictivos.

Os principios reitores que inspiran esta regulación son a promoción do coñecemento e o desenvolvemento de habilidades persoais para controlar as condutas adictivas, con especial atención á capacitación e participación familiar; o impulso de accións informativas, de sensibilización e educativas por parte das administracións autonómicas, en colaboración coas locais, fomentando un lecer creativo e saudable; a formación especializada do persoal docente e sanitario e dos sectores vinculados a actividades de lecer e xogo sobre prevención de condutas adictivas; a limitación estrita da publicidade, promoción e acceso das persoas menores de idade a produtos con potencial adictivo ou nocivo, como bebidas alcohólicas, produtos do tabaco e produtos relacionados co tabaco, cánnabis, bebidas enerxéticas e determinados videoxogos; e a



desnormalización social do consumo destas substancias e condutas, fronte ás estratexias da industria, que procuran presentalas como aceptables ou incluso beneficiosas.

Finalmente, inclúense innovacións normativas para prohibir e restrinxir a venda, o consumo, a publicidade e o acceso de persoas menores de idade a estes produtos e actividades. Tamén clarifica responsabilidades e competencias de inspección e sanción e establece mecanismos para a coordinación administrativa, participación social e xeración de información estatística relativa ao consumo e aos riscos das adiccións.

Con esta lei preténdese garantir a protección integral da saúde pública da poboación máis nova, achegando un marco regulador moderno e eficaz para a prevención, o control e a redución das condutas adictivas, contribuíndo así a construír unha sociedade máis saudable e segura.

II

A Constitución española recoñece no seu artigo 43 o dereito á protección da saúde. O Estatuto de autonomía de Galicia atribúelle á Comunidade Autónoma de Galicia, nos artigos 27.23 e 33, respectivamente, a competencia exclusiva na materia de asistencia social e para o desenvolvemento lexislativo e a execución da lexislación básica do Estado na materia de sanidade interior.

A primeira lei que regulou en Galicia distintos aspectos das drogodependencias foi a Lei 2/1996, do 8 de maio, de Galicia sobre drogas, que proporcionou o marco normativo no que se apoiaron as medidas necesarias para reducir a problemática das drogodependencias, tanto no que respecta á prevención como á asistencia e á participación da sociedade na abordaxe deste tema.

No caso do tabaco, actualmente cóntase coa Lei 28/2005, do 26 de decembro, de medidas sanitarias fronte ao tabaquismo e reguladora da venda, a subministración, o consumo e a publicidade dos produtos do tabaco, de ámbito estatal. No relativo ao alcohol, Galicia foi pioneira ao aprobar en 2010 a Lei 11/2010, do 17 de decembro, de prevención do consumo de bebidas alcohólicas en menores de idade. Esta lei permitiu elevar a idade mínima de consumo de alcohol aos 18 anos e restrinxiu o acceso das persoas menores de idade a certos lugares onde se permitía a venda de alcohol, entre outras medidas.

Os antecedentes normativos relativos a outras substancias psicoactivas están dispersos en normas xenéricas, tanto estatais como autonómicas, como o Código penal (artigo 368, incluído no capítulo de delitos contra a saúde pública) e a Lei orgánica 40/2015, do 30 de marzo, de protección da seguridade cidadá, e no relativo ao xogo temos aprobada a Lei 3/2023, do 4 de xullo, reguladora dos xogos de Galicia.

Por outra parte, a Lei 8/2008, do 10 de xullo, de saúde de Galicia, establece, no seu artigo 34.4 (modificado pola Lei 8/2021, do 25 de febreiro), como intervencións públicas que poderán ser exercidas polas autoridades sanitarias competentes sobre as actividades públicas e privadas que directa ou indirectamente poidan ter consecuencias para a saúde a de «establecer prohibicións e requisitos mínimos para o uso e tráfico de bens e produtos cando supoñan un prexuízo ou ameaza para a saúde mediante normativa», a de «controlar a publicidade e propaganda de produtos e actividades que poidan ter incidencia sobre a saúde, co fin de axustala a criterios de veracidade e



evitar o que poida constituír un prexuízo para esta» e a de «establecer prohibicións, limitacións e estratexias de prevención do consumo de bebidas alcohólicas para avanzar na desnormalización do seu consumo polas persoas menores de idade».

Ademais, o texto refundido da Lei xeral para a defensa dos consumidores e usuarios, aprobado polo Real decreto lexislativo 1/2007, do 16 de novembro, establece como dereitos básicos das persoas consumidoras e usuarias e das persoas consumidoras vulnerables o da protección contra os riscos que poidan afectar a súa saúde ou seguridade e o da protección dos seus dereitos mediante procedementos eficaces, en especial en relación coas persoas consumidoras vulnerables. Sinala tamén que os dereitos das persoas consumidoras vulnerables gozarán dunha especial atención, que será recollida regulamentariamente e pola normativa sectorial que resulte aplicable en cada caso. Igualmente, dispón que os poderes públicos promoverán políticas e actuacións tendentes a garantir os seus dereitos en condicións de igualdade, consonte a concreta situación de vulnerabilidade na que se atopen. En relación con isto, cómpre pois traer a colación o disposto no artigo 30.1.4 do Estatuto de autonomía de Galicia, o cal recoñece á Comunidade Autónoma galega a competencia exclusiva na materia de comercio interior e defensa do consumidor e usuario, sen prexuízo da política xeral de prezos e da lexislación sobre a defensa da competencia, e de acordo coas bases e a ordenación da actuación económica xeral e a política monetaria do Estado.

Cómpre sinalar tamén que o artigo 27.22 do Estatuto de autonomía de Galicia establece que corresponde á Comunidade Autónoma de Galicia a competencia exclusiva en materia da adecuada utilización do lecer. Neste marco, a Lei orgánica 16/1995, do 27 de decembro, de transferencia de competencias á Comunidade Autónoma de Galicia, transfire a competencia exclusiva na materia de espectáculos públicos, sen prexuízo da competencia estatal sobre seguridade pública. É preciso ter en conta neste sentido o Decreto 336/1996, do 13 de setembro, sobre asunción de funcións e servizos transferidos á Comunidade Autónoma de Galicia na materia de asociacións e espectáculos públicos, respectivamente, polos reais decretos 1639/1996 e 1640/1996, ambos do 5 de xullo, e a súa asignación á Consellería de Xustiza, Interior e Relacións Laborais.

Así mesmo, o artigo 27.31 do Estatuto de autonomía de Galicia atribúelle á Comunidade Autónoma competencia exclusiva na materia de publicidade, sen prexuízo das normas ditadas polo Estado para sectores e medios específicos conforme os ordinais 1º, 6º e 8º do número 1 do artigo 149 da Constitución.

Pola súa banda, o Decreto 144/2024, do 20 de maio, polo que se establece a estrutura orgánica da Consellería de Sanidade, establece que a misión da Dirección Xeral de Saúde Pública é a mellora da saúde da poboación galega desde unha perspectiva comunitaria.

III

A Lei de protección da saúde das persoas menores e prevención das condutas adictivas presenta unha estrutura composta por sesenta e cinco artigos, distribuídos en sete títulos, catro disposicións adicionais, unha disposición transitoria, unha disposición derogatoria e tres disposicións derradeiras.



O título preliminar establece os obxectivos xerais e específicos da lei, así como as definicións de aspectos relevantes regulados e os principios reitores. O obxecto inclúe aspectos relacionados coas grandes áreas de intervención, isto é, as áreas de promoción da saúde, prevención das adiccións, redución da oferta, desenvolvemento e xestión do coñecemento, así como a regulación da organización institucional.

O ámbito material da lei abrangue as substancias psicoactivas, algunhas con ampla aceptación social, como o alcohol, o tabaco, a cafeína e outras, como os derivados do cánnabis, que, aínda que son ilegais e xa teñen normativa específica, é necesario regular en aspectos relativos á súa promoción e patrocinio.

Como novidade, a lei regula os DSLN, que son aqueles produtos, ou calquera dos seus compoñentes, incluídos un cartucho, un depósito e o dispositivo sen cartucho ou depósito, que poidan utilizarse para o consumo de vapor que conteña nicotina, a través dunha boquilla, pois non hai evidencia científica que apoie a súa utilidade para deixar de fumar. Aplícanse as mesmas restricións que ao tabaco.

Tamén se regulan aspectos relativos ás bebidas enerxéticas e se establecen medidas de prevención no relativo ás adiccións sen substancia, principalmente no caso de xogos con cartos, presenciais ou a distancia, e o uso de videoxogos.

No título I abórdanse a promoción da saúde e a prevención de adiccións, co obxectivo de conseguir aumentar a percepción de risco ante as adiccións e o fomento de estilos de vida saudables na poboación en xeral e nas persoas menores de idade, en particular.

Inclúense medidas sobre as adiccións sen substancia, aínda que na actualidade, excepto a ludopatía e o trastorno por uso de videoxogos, non se recolleron cientificamente como tales. Sobre todo incídese nas condutas adictivas relacionadas co xogo, presencial ou en liña, con especial atención aos videoxogos e á utilización de dispositivos conectados debido ao aumento da prevalencia, así como á ampla preocupación detectada entre as familias e as e os profesionais dedicados á prevención e atención ás adiccións en Galicia. Neste sentido, inclúense medidas de forma transversal en todos os programas da carteira de servizos de prevención de condutas adictivas da nosa Comunidade Autónoma. Promóvese a realización de programas orientados a un xogo responsable, tanto presencial como en liña, e a un uso proporcionado dos videoxogos con respecto ao resto de actividades de lecer das persoas menores de idade.

Considérase prioritaria a educación para a saúde, de forma que se poidan fomentar os estilos de vida saudables en todos os ámbitos: escolar, familiar, laboral, sanitario e comunitario.

O capítulo dedicado á prevención recolle medidas xerais dirixidas ao conxunto da poboación, e outras dirixidas a persoas ou grupos en situación de risco ou de maior vulnerabilidade. Trátase de potenciar os factores de protección e reducir os factores de risco, así como de desnormalizar algunhas condutas aceptadas socialmente, como o consumo de alcohol e de tabaco. Nas actuacións preventivas son prioritarios os ámbitos familiar, comunitario, educativo e sanitario, que, na medida do posible, deberán coordinarse entre si para poder potenciar a consecución dos seus obxectivos mutuos.



O título II regula o control da oferta. Diferénciase este apartado do de diminución da demanda, igual que se fai na Estratexia da Unión Europea na materia de loita contra a droga 2021-2025, xa que as medidas dirixidas a limitar a demanda poñen a énfase na actuación sobre as persoas ou os grupos e as de redución da oferta actúan sobre as substancias ou sobre as condutas.

Establécese unha estrutura clasificada pola substancia e, dentro de cada unha, regúlase a actividade xerada ao redor dela; isto é, a publicidade, a promoción, o patrocinio, a venda, a subministración, o transporte e o consumo.

As drogas sobre as que se establecen as medidas de control son as legais e algunha ilegal, como o cánnabis. No caso do alcohol, auméntanse as limitacións xa impostas a través da Lei 11/2010, do 17 de decembro, tendo en conta que non existe unha normativa reguladora de ámbito nacional. Non obstante, ás festas recoñecidas de interese turístico non lles serán aplicables as restricións de publicidade e promoción establecidas na lei.

No relativo ao tabaco, seguindo as recomendacións da Organización Mundial da Saúde e das sociedades científicas, dáse o mesmo trato aos DSLN que aos produtos do tabaco, dado que, se o dispositivo é susceptible de liberar nicotina, enténdese que os seus efectos tanto para a persoa usuaria como para terceiras persoas non difiren dos do tabaco. Tamén se inclúen medidas como a prohibición do consumo nas entradas dos centros educativos e administrativos, aspectos non recollidos na normativa de ámbito estatal. Deste xeito, preténdese preservar a saúde das persoas non fumadoras.

Por outra parte, limítanse o consumo e a venda de bebidas enerxéticas a persoas menores de idade. Segundo un estudo realizado pola Autoridade Europea de Seguridade Alimentaria (EFSA) en 2015, o consumo de máis de 1,4 mg/kg de peso corporal de cafeína estaría asociado a alteracións do sono (latencia e duración) e o consumo de máis de 3 mg/kg de peso corporal de cafeína estaría asociado a efectos adversos xerais para a saúde (efectos cardiovasculares, hematolóxicos, neurolóxicos e psicocomportamentais). Por exemplo, se un neno ou nena (cun peso medio de 37 kg) consome unha lata de bebida enerxética cunha concentración de cafeína de 32 mg/100 ml, estaría a inxerir 2,2 mg de cafeína.

Tendo en conta que os envases máis habituais no mercado conteñen 32 mg/100 ml de cafeína e que con estas concentracións sería moi doado superar os límites referidos que produzan efectos prexudiciais na infancia e na adolescencia, establécese a prohibición da venda e do consumo de bebidas enerxéticas, entendidas como aquelas que conteñan 32 mg/100 ml ou máis de cafeína, a persoas menores de idade. Nesta mesma liña recóllese nas lexislacións de Alemaña e de Dinamarca, que limitan o contido de cafeína nas bebidas enerxéticas a 32 mg/100 ml.

No título III abórdase a problemática da atención das persoas menores de idade en urxencias debido a intoxicacións por substancias psicoactivas, basicamente bebedeiras. Débese realizar unha actuación máis intensiva para evitar o crecente aumento das devanditas intoxicacións neste tramo de idade.

O título IV regula os sistemas de información sobre as características dos consumos de substancias en Galicia, a súa prevención e o seu tratamento. Este sistema deberá estar integrado no sistema



de información de saúde de Galicia, definido no artigo 71 da Lei 8/2008, do 10 de xullo. Tanto a información como a avaliación teñen a consideración de actuación transversal, segundo a Estratexia da Unión Europea na materia de loita contra a droga 2021-2025.

O título V regula a organización institucional, a coordinación e a iniciativa social, establecendo o exercicio das competencias atribuídas a cada unha das administracións públicas galegas, coa finalidade de evitar duplicidades e actuacións solapadas.

Polo que respecta ao dispositivo institucional, a nivel da Administración xeral da Comunidade Autónoma prevese a creación dunha Comisión na materia de prevención das adiccións das persoas menores de idade, configurada como un órgano de estudo, coordinación e asesoramento na materia de prevención das adiccións en Galicia.

Finalmente, a iniciativa social supón o recoñecemento do importante labor realizado na materia por persoas e entidades privadas e regula as condicións que rexerán a colaboración con elas.

O título VI ocúpase dos labores de inspección, aspecto fundamental para garantir o cumprimento das limitacións establecidas.

No título VII detállanse as infraccións e as sancións. As medidas punitivas van referidas á actividade sobre as substancias, xa que, sobre as adiccións sen substancia, establecéronse medidas de promoción da saúde coas que se trata de impulsar un uso responsable dos xogos de azar e das novas tecnoloxías.

Polo que respecta aos órganos con competencias sancionadoras, distribúense estas con carácter xeral entre a consellaría competente na materia de saúde pública, tanto desde servizos centrais como por parte dos órganos periféricos, e os concellos.

Dentro das competencias sancionadoras que os departamentos territoriais da consellaría competente na materia de saúde pública xa tiñan atribuídas, inclúese a relativa á imposición de sancións pola comisión de infraccións relativas ao botellón, por entender que se incrementa a eficacia da corrección deste tipo de infraccións ao equipararse coa xestión das sancións por consumo de tabaco, DSLN e produtos relacionados co tabaco.

Completan o texto catro disposicións adicionais, sobre os corpos facultativos da Administración autonómica encargados das inspeccións, a habilitación para a actualización periódica das contías das sancións e algunhas excepcións no relativo a festas declaradas de interese turístico, así como a previsión da ausencia de custos asociados ao funcionamento da Comisión na materia de prevención das adiccións das persoas menores de idade en Galicia; unha disposición transitoria, relativa ao réxime transitorio de procedementos sancionadores iniciados antes ou despois da entrada en vigor desta lei; unha disposición derogatoria, que afecta as disposicións de igual ou inferior rango contrarias ao disposto nesta lei; e tres disposicións derradeiras, sobre o desenvolvemento regulamentario e a entrada en vigor, incorporando ademais a primeira delas algunhas modificacións puntuais no tocante á tipificación do incumprimento da prohibición de consumo de bebidas alcohólicas na vía pública, nos parques e prazas públicas e noutros lugares de tránsito público.



Esta lei promúlgase baixo o máis estrito respecto á autonomía municipal e ao actual marco normativo.

Esta lei foi sometida ao preceptivo ditame do Consello Económico e Social de Galicia.

TÍTULO PRELIMINAR

Disposicións xerais

Artigo 1. *Obxecto*

1. Esta lei ten por obxecto regular as actuacións e as iniciativas que se van desenvolver no ámbito da Comunidade Autónoma de Galicia para prever as condutas adictivas nas persoas menores de idade. As medidas previstas nesta lei teñen tamén como obxecto incidir sobre a sociedade no seu conxunto para avanzar na desnormalización dos comportamentos adictivos, mediante:

a) A definición das características que deberán ter as estratexias de prevención das adiccións, de educación sanitaria e de concienciación social e das familias, para abordar o grave problema xerado.

b) A limitación do acceso das persoas menores de idade ás bebidas alcohólicas e enerxéticas, aos produtos do tabaco e a outras substancias psicoactivas, así como o control administrativo desta restrición que aborde tanto a venda e a subministración como o propio consumo.

c) O aumento da protección fronte á exposición pasiva ao fume do tabaco, especialmente no caso das persoas menores de idade e da poboación vulnerable.

d) As limitacións de acceso de persoas menores de idade a determinados establecementos de ocio e entretemento.

e) As prohibicións e as limitacións á publicidade, á promoción e ao patrocinio de bebidas alcohólicas, bebidas enerxéticas, produtos do tabaco e resto de substancias psicoactivas reguladas nesta lei.

f) A promoción da cesación tabáquica entre as persoas fumadoras, atendendo especialmente á influencia do tabaquismo nas persoas menores de idade.

g) A creación do sistema de información sobre os resultados da aplicación da lei.

h) As limitacións horarias á venda nocturna de bebidas alcohólicas.

i) A prevención do xogo problemático.

j) O establecemento das condicións relativas á venda de videoxogos.

k) A promoción do uso axeitado de videoxogos, redes sociais, tecnoloxías dixitais e dispositivos conectados.



l) A determinación do réxime sancionador.

Artigo 2. *Ámbito de aplicación*

As disposicións contidas nesta lei serán aplicables ás diferentes actuacións previstas nela, tanto individuais como colectivas, públicas ou privadas, que se realicen no territorio da Comunidade Autónoma de Galicia e no marco das súas competencias.

Artigo 3. *Principios reitores da lei*

Esta lei ten como principios reitores os seguintes:

- a) A responsabilidade das administracións e da sociedade no seu conxunto para previr as adicións nas persoas menores de idade e traballar na desnormalización progresiva do seu consumo en toda a poboación.
- b) O equilibrio e o consenso social que permita aos sectores económicos afectados por esta lei acadar os seus obxectivos desde unha perspectiva de responsabilidade social.
- c) A actitude de proactividade, mellora continua e transparencia que permita ás diferentes administracións dar resposta ás demandas sociais e aos problemas emerxentes relacionados coas adicións.
- d) A participación activa da comunidade, moi especialmente do Consello Autonómico de Infancia e Adolescencia e das organizacións xuvenís, e dos sectores afectados, na planificación e na execución das actuacións na materia de prevención das adicións.
- e) A consideración da familia como elemento esencial na percepción de risco por parte das persoas menores de idade.
- f) A promoción activa de estilos de vida saudables e dunha cultura de saúde que inclúa o rexeitamento do consumo por parte das persoas menores de idade, así como a modificación de actitudes e comportamentos da sociedade respecto da problemática vinculada a este tema, coa aplicación do principio de equidade e atención preferente ás persoas menores en situación de vulnerabilidade, en risco de exclusión ou con problemas de saúde, en particular de saúde mental.
- g) A planificación das intervencións tendo en conta a evidencia científica dispoñible e con base en criterios de efectividade, establecendo indicadores que permitan realizar un axeitado control, seguimento e avaliación delas.
- h) A consideración prioritaria das políticas e das actuacións preventivas na materia de prevención das adicións.
- i) O carácter multidisciplinario e de integración e coordinación das actuacións na materia de prevención das adicións por parte de todas as administracións públicas galegas.



j) A coordinación das actuacións sobre a problemática asociada ás adiccións na poboación, con especial énfase nas persoas menores de idade, con base no principio de corresponsabilidade social.

k) A inclusión da perspectiva de xénero en todas as actuacións que se realicen.

l) A promoción da equidade en saúde a través do acceso da poboación aos servizos preventivos, sen que exista ningunha discriminación.

m) Os principios reitores en canto ás actuacións sanitarias que se enuncian no artigo 32 da Lei 8/2008, do 10 de xullo, de saúde de Galicia.

Artigo 4. *Definicións*

Para os efectos desta lei, entenderase por:

a) Bebida alcohólica: aquela bebida que contén etanol nunha proporción superior ao 1,2 por cento do seu volume.

b) Bebida enerxética: bebida refrescante que contén cafeína en valores iguais ou superiores a 32 mg/100 ml acompañada doutros ingredientes estimulantes.

c) Centro docente: centro educativo que imparta educación primaria e secundaria e outras ensinanzas oficiais para persoas menores de idade.

d) DSLN: produto, ou calquera dos seus compoñentes, incluídos un cartucho, un depósito e o dispositivo sen cartucho ou depósito, que poida utilizarse para o consumo de vapor que conteña nicotina a través dunha boquilla. Os DSLN poden ser desbotables ou recargables mediante un envase de recarga e un depósito, ou recargables con cartuchos dun só uso.

e) Establecemento de lecer e entretemento: calquera establecemento público no que teñan lugar actividades de entretemento e lecer das persoas e no que se vendan bebidas alcohólicas. En particular, terán a consideración de establecementos de lecer e entretemento, para os efectos desta lei, as discotecas, as salas de festa, os pubs e os cafés-espectáculo, de acordo co disposto no Decreto 124/2019, do 5 de setembro, polo que se aproba o Catálogo de espectáculos públicos, actividades recreativas e establecementos abertos ao público da Comunidade Autónoma de Galicia e se establecen determinadas disposicións xerais de aplicación na materia, así como calquera outro establecemento no que, aínda que con outra denominación, se desenvolvan actividades da mesma natureza que nos anteriores.

Para os efectos desta lei, non terán a consideración de establecementos de lecer e entretemento os furanchos, aos que se lles aplicarán as previsións contidas nesta lei para os establecementos de hostalaría e de restauración.

f) Establecementos de hostalaría e de restauración: establecementos abertos ao público e legalmente habilitados que teñen por obxecto a prestación do servizo de bebida e/ou comida para o seu consumo polo público a cambio dun prezo, consonte o disposto na súa normativa específica.



g) Horario nocturno: o período de tempo comprendido entre as 22.00 e as 9.00 horas do día seguinte.

h) Patrocinio: calquera tipo de contribución, pública ou privada, a un acontecemento, unha actividade ou unha persoa cuxo obxectivo ou efecto directo ou indirecto sexa a promoción de calquera dos produtos regulados nesta lei.

i) Produtos do tabaco: produtos que poden ser consumidos ou constituídos, total ou parcialmente, por tabaco, xeneticamente modificado ou non.

j) Produtos relacionados co tabaco: calquera dispositivo susceptible de liberación de nicotina, envases de recarga e produtos para fumar a base de herbas, de plantas ou de froitas que non conteñen tabaco e se poden consumir mediante un proceso de combustión.

k) Promoción: todo estímulo da demanda de bebidas alcohólicas, bebidas enerxéticas, tabaco, produtos do tabaco e DSLN e produtos relacionados co tabaco, como anuncios, publicidade e actos especiais, entre outros, destinados a atraer a atención e suscitar o interese das persoas consumidoras.

l) Publicidade: toda forma de comunicación realizada por unha persoa física ou xurídica, pública ou privada, no exercicio dunha actividade comercial, industrial, artesanal ou profesional, co fin de promover de forma directa, indirecta ou subliminar a contratación de bens mobles ou inmobles, servizos, dereitos e obrigas.

m) Subministración: abastecemento de produtos ou substancias previstas nesta lei, xa sexa a título oneroso ou gratuíto.

n) Substancia psicoactiva: substancia que, introducida no organismo por calquera vía de administración, produce unha alteración do funcionamento do sistema nervioso central do individuo, a cal modifica a conciencia, o estado de ánimo ou os procesos de pensamento.

TÍTULO I

Promoción da saúde e prevención das adiccións

Artigo 5. *Obxecto*

1. A Administración xeral da Comunidade Autónoma promoverá, a través dos instrumentos xurídicos que en cada caso correspondan, o fomento de actuacións de promoción da saúde e de prevención das adiccións na poboación menor de idade e nos grupos especialmente vulnerables por parte das administracións locais e entidades sen ánimo de lucro.

2. As medidas contidas neste título estenderanse, tendo en conta o estado do coñecemento científico en cada momento, a aquelas outras condutas susceptibles de xerar un trastorno adictivo.



CAPÍTULO I

Promoción da saúde

Artigo 6. *Actuacións de promoción da saúde no ámbito das condutas adictivas*

1. A Administración xeral da Comunidade Autónoma promoverá, a través dos instrumentos xurídicos que en cada caso correspondan, o fomento por parte das administracións locais e entidades sen ánimo de lucro de accións da mellora do coñecemento e de desenvolvemento de habilidades persoais dirixidas a incrementar o control da poboación sobre a súa saúde no que respecta ás condutas adictivas, con especial atención ao fomento da capacitación e da participación das familias.

2. A consellaría competente na materia de saúde pública impulsará a realización de programas de promoción da saúde no ámbito das condutas adictivas dirixidos a toda a poboación, fomentando a colaboración de profesionais sanitarios e sociais, e da educación nestes programas.

Artigo 7. *Promoción do non consumo de substancias psicoactivas*

A Administración xeral da Comunidade Autónoma promoverá, a través dos instrumentos xurídicos que en cada caso correspondan, a realización por parte das administracións locais e entidades sen ánimo de lucro de campañas informativas e formativas dirixidas a persoas menores de idade e poboación xeral sobre as consecuencias prexudiciais do consumo de alcohol, tabaco, cánnabis, bebidas enerxéticas e outras substancias psicoactivas e sobre a súa percepción de risco.

Artigo 8. *Prevención do xogo problemático*

1. A Administración xeral da Comunidade Autónoma impulsará, a través dos instrumentos xurídicos que en cada caso correspondan, a realización por parte das administracións locais e entidades sen ánimo de lucro de accións informativas e de sensibilización, así como accións de carácter educativo que promovan un ocio creativo e saudable, especialmente para persoas menores de idade, grupos vulnerables e xuventude en xeral, e para evitar que a poboación estableza relacións problemáticas coas actividades de xogo.

Ademais, procurarase que a poboación coñeza a problemática da adicción ao xogo e os factores de risco e de protección implicados.

2. Estas mesmas administracións impulsarán actuacións de formación e sensibilización dirixidas ao persoal docente e sanitario e ás persoas traballadoras das empresas operadoras de xogo sobre aspectos específicos da prevención do xogo problemático. Estas actividades formativas incluírán entre os seus contidos:

- a) Lexislación vixente sobre a materia.
- b) Prevención do xogo ilegal e do uso inadecuado dos xogos.
- c) Protocolo de actuación con persoas que amosen patróns de xogo desadaptativo.

A consellaría competente na materia de saúde pública desenvolverá regulamentariamente as condicións nas que se desenvolverá a formación á que fai referencia este número.



Artigo 9. Promoción do uso adecuado e seguro dos videoxogos, das redes sociais, das tecnoloxías dixitais e dos dispositivos conectados

Co fin de prever os problemas que poida xerar o uso inadecuado dos videoxogos, das redes sociais, das tecnoloxías dixitais e dos dispositivos conectados, a Administración xeral da Comunidade Autónoma, coa colaboración da Administración local a través da subscrición dos oportunos convenios ou de actividades de fomento, levará a cabo as seguintes actuacións:

a) Promover campañas de sensibilización da poboación sobre a necesidade de facer un uso apropiado destas tecnoloxías, especialmente no caso das persoas menores de idade, evitando a interferencia negativa coa vida familiar e social e os problemas de saúde e desenvolvemento.

b) Impulsar actividades de formación e capacitación da poboación para o uso adecuado e seguro dos videoxogos, das redes sociais, dos dispositivos conectados e das tecnoloxías dixitais. Prestarase especial atención á protección das persoas menores de idade a través de:

1º. Capacitar as familias para a definición do uso e consumo axeitado para as persoas menores de idade no que respecta á supervisión, soportes de acceso, tempos de uso e contidos.

2º. Difundir e promover o uso de aplicacións e mecanismos de control parental e dos sistemas de clasificación de contidos.

c) Promover o desenvolvemento de accións no ámbito educativo que teñan por obxecto permitir á mocidade acadar un equilibrio axeitado entre o aproveitamento das potencialidades destas tecnoloxías, o ocio saudable e o desenvolvemento dun bo nivel de saúde mental e física.

d) Promover protocolos nos sistemas sanitario e de protección social de avaliación e consello sobre o uso destes dispositivos e tecnoloxías, nos que se abordarán os tempos de uso, a supervisión, os contidos aos que se accede e a súa interferencia co tempo de descanso, o rendemento académico ou laboral e a vida familiar e social.

e) Promover a adopción de medidas orientadas a mellorar a información sobre os riscos asociados á utilización non adecuada dos videoxogos, Internet, redes sociais e outras tecnoloxías dixitais, promovendo a inclusión de mensaxes preventivas nos videoxogos, nas páxinas web e nas aplicacións con sede ou editadas en Galicia, así como nas súas redes sociais, en particular cando as ditas redes teñen como público preferente a poboación menor de idade.

CAPÍTULO II

Prevención das adiccións

Artigo 10. Obxectivos

1. As actividades preventivas terán como obxectivo primordial evitar o consumo de substancias psicoactivas e a realización de determinados comportamentos adictivos, atrasar a idade de inicio e prever a posibilidade de desenvolver unha adicción.



2. A prevención combinará o seu carácter educativo, orientado á diminución da demanda a través da modificación de actitudes e hábitos, coa protección da saúde, orientada á diminución da oferta, a través da modificación de contornas que faciliten a adopción de estilos de vida saudables, e ao establecemento de limitacións a certas actividades que poden favorecer o inicio dos consumos.

3. As medidas de prevención consistirán na aplicación de estratexias globais e equilibradas de intervención sobre os factores de risco e de protección, tanto psicolóxicos e condutuais como familiares, sociais e ambientais que inciden na aparición de consumos de substancias psicoactivas e condutas adictivas, de tal xeito que se aumente a percepción de risco na poboación respecto dos ditos consumos e condutas.

4. As medidas de prevención faranse de forma coordinada, tanto a nivel autonómico como local, e en liña coas actuacións ou recomendacións adoptadas a nivel nacional, comunitario e internacional, e terán un carácter estable e avaliable.

Artigo 11. *Medidas de prevención orientadas á diminución da demanda*

1. As medidas de prevención para a diminución da demanda son aquelas actuacións que teñen por obxectivo a modificación da conduta mediante a educación, o asesoramento, o consello, a información e outras metodoloxías similares.

2. As administracións públicas de Galicia e as entidades que planifiquen, deseñen e executen medidas de prevención para a diminución da demanda deberán ter presentes os seguintes criterios:

a) Os programas que se levarán a cabo estarán baseados na evidencia científica dispoñible sobre esta temática.

b) As actuacións na materia de prevención das adiccións desenvolvidas polas administracións públicas de Galicia (xa sexa directamente ou coa intermediación de entidades e institucións privadas) enmarcaranse nun ámbito xeral de promoción da saúde e calidade de vida, prestando especial atención ás situacións de vulnerabilidade.

c) O ámbito prioritario da prevención será poboacional, mediante actuacións programáticas que incidan principalmente sobre os determinantes asociados á aparición do consumo de substancias psicoactivas e de comportamentos adictivos.

d) Os programas preventivos deberán ser específicos para a idade das persoas destinatarias, apropiados ao seu desenvolvemento e sensibles coas diferentes culturas.

e) As actuacións prioritarias destes programas consistirán tanto na oferta de información e asesoramento como na elaboración e implantación de estratexias educativas e de prevención de condutas de risco.

f) Desenvolveranse protocolos de avaliación das medidas que se planifiquen, contando coa participación social de todos os axentes implicados.



g) Promoverase a adopción de criterios de calidade na planificación, execución e avaliación das actividades, que serán establecidos polo departamento competente na materia de sanidade.

h) Fomentarase a colaboración e o intercambio de información, a nivel nacional e internacional, que facilite a implantación de accións preventivas.

i) Os programas de prevención deberán incorporar entre os seus obxectivos a modulación das crenzas e expectativas e o incremento da percepción dos riscos asociados ao consumo de substancias psicoactivas e ao desenvolvemento de comportamentos adictivos.

j) Ampliarase e mellorarase a formación continuada dos servizos e dos equipos de prevención.

3. Deberanse realizar análises da situación periódicas, utilizando a información científica dispoñible, para seleccionar as medidas preventivas de intervención máis axeitadas e as adiccións que se consideren prioritarias.

Artigo 12. *Ámbitos prioritarios de prevención*

1. Os ámbitos prioritarios de prevención para a diminución da demanda son:

a) O ámbito familiar.

b) O ámbito educativo.

c) O ámbito comunitario.

d) O ámbito sanitario.

e) O ámbito da hostalaría e da restauración.

f) O ámbito de intervención en colectivos de especial vulnerabilidade.

2. As medidas que se establezan nos plans de actuación que as administracións públicas galegas promovan deberán ser transversais e terán en consideración os seis ámbitos prioritarios de prevención.

Artigo 13. *A prevención no ámbito familiar*

Os programas, as actuacións e as medidas de prevención no ámbito familiar deberán ter en conta os seguintes criterios:

a) Fomentar a formación das familias no ámbito das adiccións mediante a colaboración coas asociacións de nais e pais e as súas federacións, dada a súa importancia como axentes de saúde.

b) Potenciar as habilidades educativas e de comunicación no seo familiar para evitar o desenvolvemento de trastornos adictivos en todos os ámbitos e resolver os problemas derivados destes.



c) De xeito específico, abordar a problemática ocasionada polo uso das tecnoloxías dixitais, principalmente co uso das redes sociais e dos videoxogos.

d) Conter mecanismos de coordinación entre os ámbitos sanitario, educativo, social e comunitario.

Artigo 14. *A prevención no ámbito educativo*

Os programas, as actuacións e as medidas de prevención no ámbito educativo deberán ter en conta no seu deseño os seguintes aspectos:

a) Promover a implicación do conxunto da comunidade educativa.

b) Integrar a educación para a saúde como parte do proxecto educativo dos centros docentes, concibido dun xeito transversal. Os centros incluírán nas súas programacións actividades complementarias para o fomento de estilos de vida saudables e de prevención das adiccións.

c) Realizar actuacións continuadas no tempo e estables, adaptándose a cada nivel educativo.

d) Conter mecanismos de coordinación e integración das accións das distintas administracións públicas galegas e organizacións implicadas, co obxectivo de desenvolver materiais de apoio para o profesorado e o alumnado, cun alto nivel de calidade.

e) Recoller o desenvolvemento de programas específicos de formación continuada do persoal docente na materia de adiccións, incluíndo formación sobre técnicas de detección precoz de situacións de risco e programas preventivos específicos para o alumnado de especial vulnerabilidade, así como programas de adestramento en habilidades persoais, sociais e de resistencia á influencia negativa exercida polo grupo de iguais.

f) Potenciar os programas de formación continuada específicos sobre adiccións para o profesorado universitario que imparte formación nas titulacións pertencentes ás ramas sociosanitarias.

g) Incluír en todos os programas de formación a problemática ocasionada polo uso das tecnoloxías dixitais e, en particular, das redes sociais e dos videoxogos.

Artigo 15. *A prevención no ámbito comunitario*

Os programas, as actuacións e as medidas de prevención no ámbito comunitario deberán ter en conta os seguintes criterios:

a) Procurar o reforzo das mensaxes e das normas da comunidade en contra do consumo de substancias psicoactivas e da realización de determinados comportamentos adictivos, en prol da saúde.

b) Fomentar a educación para a saúde, na que participarán as familias e a mocidade, para identificar sinais de alerta e ofrecer pautas á mocidade para que aprenda mecanismos de autorregulación e límites adaptados á idade de maduración dos seus fillos e fillas.



c) Favorecer o desenvolvemento de actividades comunitarias e/ou grupais relacionadas coa educación familiar temperá, previa á aparición de condutas de risco, con recomendacións xerais que reforcen os factores de protección.

d) Fomentar o traballo de proximidade, entendendo este como a actividade orientada cara á comunidade e emprendida para tomar contacto con persoas ou subpoboacións de especial risco, ás cales normalmente non chegan as canles tradicionais de fomento de estilos de vida saudables, así como establecer redes de cooperación entre os organismos que o realicen con outros contextos onde haxa programas de prevención de trastornos adictivos.

e) Promover a capacitación de persoas que actúen como mediadoras sociais.

f) Realizar campañas de información e sensibilización como reforzo doutras accións e iniciativas en relación cos medios de comunicación social.

g) Fomentar a implicación dos concellos e o seu papel nas accións de ámbito comunitario.

h) Potenciar entre as diferentes administracións públicas galegas unha política global de alternativas ao consumo de substancias psicoactivas e a determinadas condutas adictivas, como o uso problemático das redes sociais e dos videoxogos por persoas menores de idade, actuando nos ámbitos cultural, deportivo e social e impulsando servizos socioculturais, actividades de lecer e tempo libre e promoción do deporte. Para iso estableceranse canles de diálogo e participación coa comunidade destinataria, coas entidades e asociacións deportivas e culturais e cos restantes axentes implicados, co fin de determinar as actuacións que se van desenvolver e construír unha cultura de lecer alternativa adaptada á demanda e ás necesidades reais.

i) O deber de promover, tanto os concellos como as institucións educativas, a realización de actividades deportivas continuadas no tempo, preferentemente supervisadas polas correspondentes entidades deportivas da Administración autonómica con competencias no ámbito deportivo. Estas actividades deben empezar na educación primaria, con vistas a manterse tamén na educación secundaria.

j) Establecer accións para combater actitudes favorables ou tolerantes cara ao consumo de substancias psicoactivas e as adicións sen substancia, como o uso problemático das redes sociais e dos videoxogos, e incrementar a percepción de risco na poboación.

k) Potenciar os programas de formación continuada específicos na materia de adicións, con especial referencia ao consumo de substancias psicoactivas e ao uso problemático das redes sociais e dos videoxogos, para os e as profesionais dos corpos e forzas de seguridade.

l) Incluír estratexias preventivas de diminución do dano dentro dos programas de lecer saudable ou alternativo.

m) Promover o asociacionismo coa finalidade da promoción da saúde desde os ámbitos educativo, sanitario, social ou cultural.



Artigo 16. *A prevención no ámbito sanitario*

Os programas, as actuacións e as medidas de prevención no ámbito sanitario deberán preverse na carteira de servizos e, en todo caso, nos plans locais de saúde que se desenvolvan desde a atención primaria, tendo en conta os seguintes criterios:

- a) Os programas de saúde das persoas menores de idade, a partir de 12 anos, incorporarán intervencións preventivas de cribado e intervención do consumo de alcohol, tabaco, cánnabis e bebidas enerxéticas e o uso problemático das tecnoloxías dixitais.
- b) Na intervención pediátrica deberase aumentar a percepción do risco en familias e adolescentes, aconsellar sobre como evitar o consumo de substancias psicoactivas e a exposición pasiva ao fume ambiental do tabaco e mobilizar a familia sobre a súa corresponsabilidade na prevención do consumo de alcohol, tabaco, cánnabis e bebidas enerxéticas e o uso problemático das tecnoloxías dixitais.
- c) Nos plans de formación continuada dirixidos aos e ás profesionais de atención primaria incluíranse as recomendacións máis recentes en relación co uso de pantallas e dispositivos conectados, e técnicas de consello, intervención e entrevista motivacional breve.
- d) No caso de que o ou a profesional de pediatría considere que o ou a paciente ten un problema relacionado co consumo de substancias psicoactivas, co xogo ou co uso de Internet e das TIC que deba ser tratado cunha intervención específica, poderá derivalo ou derivala aos recursos asistenciais da rede galega de atención á saúde mental.
- e) Estes recursos asistenciais avaliarán o caso e implantarán un plan terapéutico individualizado para tratar o problema que motiva a interconsulta. Entre as actuacións que se levarán a cabo inclúese a educación sanitaria, a indicación e o control de tratamentos farmacolóxicos e as psicoterapias individuais e de grupo.

Artigo 17. *A prevención no ámbito da hostalaría e da restauración*

- 1. As actuacións no ámbito da hostalaría e da restauración terán como obxectivo formar os e as profesionais deste sector en aspectos específicos da prevención do consumo de substancias psicoactivas, con especial atención ás bebidas alcohólicas, por parte das persoas menores de idade, así como na lexislación vixente sobre esta materia.
- 2. O órgano directivo competente na materia de saúde pública da consellaría competente na materia de sanidade, en colaboración e coordinación con aqueloutros departamentos con competencias en materias afectadas por esta lei, fomentará a existencia dunha formación homoxénea para toda a comunidade autónoma impartida por persoal técnico experto na materia, procurando a colaboración das asociacións profesionais do sector da hostalaría.
- 3. Así mesmo, no ámbito da formación regrada dos e das profesionais da hostalaría, procurarase que nos currículos formativos se integre a formación sobre a prevención do consumo de substancias psicoactivas, no marco das competencias da Comunidade Autónoma e de acordo coa lexislación básica estatal.



Artigo 18. *Formación no ámbito da hostalaría e da restauración*

As persoas titulares dos establecementos de hostalaría e da restauración garantirán a formación das persoas que traballen nestes establecementos sobre a normativa aplicable a eles na materia de consumo de substancias psicoactivas por parte das persoas menores de idade, incluíndo a actuación que se vaia desenvolver fronte ás persoas que presenten síntomas de embriaguez.

A consellaría competente na materia de sanidade promoverá a celebración de xornadas formativas dirixidas co contido indicado, coa finalidade de facilitar o cumprimento da obriga establecida neste artigo.

A consellaría competente na materia de saúde pública organizará a formación gratuíta para facilitar o cumprimento deste artigo.

Artigo 19. *Ámbito de intervención en colectivos de especial vulnerabilidade*

Os programas, as actuacións e as medidas de prevención no ámbito dos colectivos especialmente vulnerables deberán ter en conta os seguintes criterios:

- a) No ámbito familiar, darase prioridade ao traballo preventivo coas familias nas que existan persoas menores de idade consideradas de especial vulnerabilidade.
- b) No ámbito escolar, realizaranse intervencións intensivas sobre grupos especialmente vulnerables.
- c) No ámbito comunitario, desde os servizos sociais dos concellos priorizarase a realización de actividades preventivas cos colectivos socialmente máis vulnerables, con especial atención á perspectiva de xénero.
- d) No ámbito sanitario, realizaranse actuacións preventivas e intervencións intensivas sobre os grupos de especial vulnerabilidade, como centros de protección de menores, programas de preservación familiar ou centros de cumprimento de medidas xudiciais de persoas menores de idade.

TÍTULO II **Control da oferta**

CAPÍTULO I **Limitacións aplicables ás bebidas alcohólicas e do acceso a determinados lugares e establecementos**

Sección 1ª. Limitacións á publicidade, á promoción e ao patrocinio de bebidas alcohólicas

Artigo 20. *Restricións á publicidade, á promoción e ao patrocinio de bebidas alcohólicas*

1. Prohíbese calquera forma directa, indirecta ou encuberta de publicidade, promoción ou patrocinio de bebidas alcohólicas dirixida ás persoas menores de idade.



2. Queda prohibida toda clase de publicidade de bebidas alcohólicas nos seguintes lugares:

a) Centros sanitarios.

b) Centros docentes.

c) Centros de acollida, de protección e de cumprimento de medidas xudiciais de persoas menores de idade.

d) Centros de ocio infantil, parques multilecer ou outros centros de ocio e recreo dirixidos a persoas menores de idade.

e) Centros ou establecementos que realizan actividades dirixidas a persoas menores de idade.

f) Recintos ou locais destinados a espectáculos públicos, actividades recreativas ou nos que se realicen competicións ou actividades deportivas cando estean dirixidas a persoas menores de idade.

g) Na vía pública nunha área de 100 metros dos centros docentes e dos centros de acollida, de protección e de cumprimento de medidas xudiciais de persoas menores de idade. A consellaría competente na materia de saúde pública publicará na súa web unha relación actualizada de centros aos que se refire este apartado.

3. Así mesmo, queda prohibida toda clase de publicidade de bebidas alcohólicas realizada a través dos seguintes medios:

a) Publicacións de libros, revistas, folletos ou calquera outro impreso ou formato dixital editados en Galicia e dirixidos a persoas menores de idade.

b) Cubertas exteriores, na portada e na contraportada de libros, revistas, folletos ou calquera outro impreso editados ou distribuídos en Galicia dirixidos a persoas menores de idade.

c) Folletos, editados ou distribuídos en Galicia, non dirixidos a menores pero que inclúan produtos destinados a persoas menores de idade e que conteñan no seu interior promocións ou ofertas de bebidas alcohólicas para a súa venda en establecementos comerciais e de alimentación localizados en Galicia. Estas deberán situarse en páxinas separadas das destinadas a produtos para persoas menores de idade e incorporarán un código QR que remita a unha páxina web da consellaría competente na materia de saúde pública con mensaxes informativas e preventivas sobre o consumo de alcohol, ou, na súa falta, un texto coas mensaxes informativas e preventivas sobre o consumo de alcohol.

4. Nas actividades de promoción e/ou patrocinio non poderán ofrecerse bebidas alcohólicas a persoas menores de idade nin poderán entregarse a estas bens ou servizos relacionados con bebidas alcohólicas ou que leven marcas, símbolos ou distintivos que poidan identificar unha bebida alcohólica.

5. Prohíbese a promoción de bebidas alcohólicas en establecementos onde estea autorizado o consumo no propio local, mediante prácticas que inciten ao consumo excesivo ou descontrolado.



Artigo 21. Acordos na materia de autolimitación da publicidade de bebidas alcohólicas

A Administración autonómica promoverá a formalización de acordos de autocontrol e autolimitación da publicidade de bebidas alcohólicas no ámbito das empresas, produtores ou as súas asociacións e distribuidoras dos ditos produtos, así como cos anunciantes, axencias e medios de publicidade que operen no seu territorio, co fin de lograr os obxectivos desta lei.

Artigo 22. Criterios sobre publicidade, promoción e patrocinio de bebidas alcohólicas

A publicidade, a promoción e o patrocinio de bebidas alcohólicas rexeranse polos seguintes criterios:

- a) Non se pode asociar o consumo de bebidas alcohólicas con comportamentos que expresen melloras no rendemento físico ou laboral ou con beneficios para a saúde, propiedades terapéuticas, efectos sedantes ou estimulantes, nin coa condución de vehículos, manexo de armas ou obxectos perigosos nin, en termos xerais, con actividades de risco.
- b) Non se pode asociar o consumo de bebidas alcohólicas con comportamentos que expresen éxito social, profesional ou sexual, nin con situacións de poder ou prevalencia.
- c) Non se permite relacionar o consumo de bebidas alcohólicas co rendemento na práctica do deporte nin con actividades educativas ou sanitarias.
- d) Non se poderán utilizar argumentos, estilos, tipografías ou deseños asociados á cultura das persoas menores de idade.
- e) Non se poderá utilizar a imaxe ou a voz de persoas menores de idade, ou que aparenten selo, ou personaxes animados, así como tampouco de persoas ou personaxes de proxección pública que sexan un referente para a infancia e a adolescencia.
- f) Non se poderá utilizar ningunha estratexia de publicidade indirecta ou subliminar coa intención de eludir as limitacións establecidas nesta lei.

Artigo 23. Actividades de colaboración coas industrias relacionadas coas materias reguladas nesta lei

A organización de actividades en centros docentes, públicos e privados, ou con organizacións infantís e xuvenís desenvolvida por empresas relacionadas directamente coa produción, distribución, venda ou subministración de bebidas alcohólicas, así como por calquera outra institución, entidade ou fundación vinculada coas primeiras ou maioritariamente financiada por elas, deberá estar autorizada polo órgano competente na materia de saúde pública.

Para estes efectos, a persoa titular da entidade interesada dirixirá unha solicitude a este órgano, cunha antelación mínima dun mes á realización da actividade, co fin de comprobar previamente que no contido destas actividades, colaboracións, acordos ou convenios non se introduce, de forma directa ou indirecta, ningún tipo de nesgo ou publicidade en favor do consumo de bebidas alcohólicas, aínda baixo as fórmulas de consumo moderado ou responsable, ou que non respecte os criterios establecidos no artigo 22.



Artigo 24. *Prohibición do emprego de imaxes con distintivos de bebidas alcohólicas*

Queda prohibida a exhibición de calquera imaxe con distintivos de bebidas alcohólicas, incluída a cartalaría de promoción e publicidade nas actividades musicais, deportivas, educativas e recreativas, así como nos espectáculos públicos ou calquera outro tipo de evento dirixido a persoas menores de idade.

Sección 2ª. Limitacións á venda, á subministración e ao transporte de bebidas alcohólicas

Artigo 25. *Limitacións á venda, á subministración e ao transporte de bebidas alcohólicas*

1. Quedan prohibidas a venda e a subministración de bebidas alcohólicas a persoas menores de idade. As persoas titulares e empregadas dos establecementos, así como calquera outra persoa que interveña na venda ou na subministración de bebidas alcohólicas, exixirán a todas as persoas compradoras, salvo que sexa evidente que son maiores de idade, acreditar a dita idade mediante documento de valor oficial.

2. Para os efectos do regulado nesta lei, incorrerán en responsabilidade as persoas maiores de idade que induzan persoas menores de idade ao consumo de bebidas alcohólicas, así como que lles vendan ou subministren bebidas alcohólicas ou que as compren para elas.

3. Para os efectos deste artigo, non será causa de exoneración de responsabilidade para as persoas subministradoras ou vendedoras a autorización escrita ou o consentimento de venda, subministración ou consumo de bebidas alcohólicas outorgado por pais, nais, titores ou titoras ou gardadores ou gardadoras legais ou de feito ás persoas menores de idade.

4. Quedan prohibidas a venda e a subministración de bebidas alcohólicas nos seguintes lugares:

a) Centros sanitarios.

b) Centros docentes.

c) Centros de acollida, de protección e de cumprimento de medidas xudiciais de persoas menores de idade.

d) Centros de ocio infantil, parques multilecer ou outros centros de ocio e recreo dirixidos a persoas menores de idade.

e) Todos aqueles centros que realizan actividades dirixidas a persoas menores de idade.

f) Recintos ou locais destinados a espectáculos públicos e actividades recreativas durante as actividades dirixidas a persoas menores de idade.

g) Recintos nos que se realicen competicións ou actividades deportivas.

5. Quedan prohibidas a venda e a subministración de bebidas alcohólicas no horario nocturno definido no artigo 4.g).



Quedan excluídas desta prohibición a venda a distancia cando o seu obxecto sexa a entrega de pedidos de restauración, así como a venda para o consumo exclusivamente no interior dos propios establecementos habilitados, a venda para a distribución a profesionais, a venda nos mercados de abastos nos seus horarios habilitados e a venda ambulante nos días de festas patronais ou similares, sempre que se dispoña do título oportuno que habilite para iso, de acordo coa normativa aplicable.

6. Quedan prohibidos o transporte, a tenza ou a posesión de bebidas alcohólicas por persoas menores de idade, salvo cando se realice por motivos laborais.

7. Queda prohibida a venda de bebidas alcohólicas en máquinas expendedoras, salvo naqueles supostos nos que se garanta a existencia dun control efectivo do cumprimento da prohibición de venda destas ás persoas menores de idade, conforme o disposto no artigo 25.1.

Artigo 26. Información sobre as limitacións

1. En todos os establecementos, sexan ou non permanentes, nos que se vendan ou subministren bebidas alcohólicas informarase das prohibicións especificadas no número 1 dos artigos 25, 28 e 29. Esta información realizarase mediante anuncios ou carteis de carácter permanente, fixados de xeito visible, en galego e en castelán. As características destas sinalizacións cumprirán os requisitos e as condicións que estableza a consellaría competente na materia de saúde pública.

2. As persoas titulares dos establecementos recollidos no número 1 adoptarán as medidas necesarias de control para evitar a venda de bebidas alcohólicas a persoas menores de idade, das que deberán informar por escrito ás persoas traballadoras.

Sección 3ª. Limitacións ao consumo de bebidas alcohólicas e ao acceso a determinados lugares e establecementos

Artigo 27. Limitacións ao consumo de bebidas alcohólicas

1. Queda prohibido o consumo de bebidas alcohólicas por persoas menores de idade.

2. Queda prohibido o consumo de bebidas alcohólicas nos seguintes lugares:

a) Centros sanitarios

b) Centros docentes.

c) Recintos nos que se realicen competicións ou actividades deportivas.

d) Centros de acollida, de protección e de cumprimento de medidas xudiciais de persoas menores de idade.

e) Centros de ocio infantil, parques multilecer ou outros centros de ocio e recreo dirixidos a persoas menores de idade.



- f) Centros ou establecementos que realizan actividades dirixidas a persoas menores de idade.
- g) Recintos ou locais destinados a espectáculos públicos e actividades recreativas durante as actividades dirixidas a persoas menores de idade.
- h) Na vía pública, agás en terrazas ou espazos habilitados como tales.
- i) Prohíbense as actividades de botellón, entendidas como tales o consumo en grupo de bebidas alcohólicas na vía pública, nos parques e prazas públicas e noutros lugares de tránsito público.

Artigo 28. Limitacións ao acceso de persoas menores de idade a lugares vinculados coa produción de bebidas alcohólicas

1. Quedan prohibidos o acceso e as visitas de persoas menores de idade aos centros de produción de bebidas alcohólicas.
2. Exceptúanse desta prohibición as visitas de persoas menores de idade sempre e cando vaian acompañadas de nais e pais, titores ou titoras, gardadores ou gardadoras legais ou persoas autorizadas por eles ou elas. Durante a visita deberase informar acerca dos efectos nocivos ou prexudiciais do consumo de bebidas alcohólicas sobre a saúde das persoas, e estará prohibido subministrar estas bebidas ás persoas menores de idade, as cales tampouco poderán participar en ningún tipo de actividade na que se utilicen bebidas alcohólicas. Así mesmo, non se lles poderá entregar artigos ou *merchandising* relacionados con bebidas alcohólicas ou que leven marcas, símbolos ou distintivos que poidan identificar unha bebida alcohólica.

Artigo 29. Limitacións ao acceso de persoas menores de idade a establecementos de lecer e entretemento

1. Queda prohibido o acceso das persoas menores de 16 anos aos establecementos de lecer e entretemento definidos no artigo 4.f), así como aos espazos destinados a espectáculos musicais, agás que estean acompañadas do seu pai, nai, titor ou titora ou gardador ou gardadora legal.
2. Excepcionalmente, os establecementos previstos no número 1 poderán realizar sesións especiais destinadas a persoas maiores de 14 anos, sempre que contén co título habilitante correspondente e coa prohibición, durante o desenvolvemento da sesión, da exhibición, publicidade, venda e consumo de bebidas alcohólicas.

CAPÍTULO II

Limitacións aplicables aos produtos de tabaco e/ou produtos relacionados co tabaco

Artigo 30. Limitacións á publicidade

A emisión nos medios de comunicación de titularidade autonómica de cine ou de series televisivas que conteñan imaxes relacionadas co tabaco e/ou produtos relacionados co tabaco deberá conter unha mensaxe expresa previa á súa emisión sobre os efectos nocivos e prexudiciais para a saúde do consumo de tales substancias.



Artigo 31. *Limitacións á venda e á subministración*

1. Prohíbese vender ou entregar ás persoas menores de idade produtos do tabaco e produtos relacionados co tabaco, de conformidade coas definicións do artigo 4, así como calquera outro produto que imite e induza a fumar ou simule a conduta de fumar.
2. Prohíbese a tenza ou o transporte por persoas menores de idade de produtos de tabaco e produtos relacionados co tabaco, salvo cando se realice por motivos laborais.
3. En todos os establecementos nos que estean autorizadas a venda e a subministración de produtos do tabaco e produtos relacionados co tabaco instalaranse en lugar visible carteis que, de acordo coas características que sinale a consellaría competente na materia de saúde pública, informen, en galego e en castelán, da prohibición de venda e de subministración de produtos de tabaco e produtos relacionados co tabaco ás persoas menores de idade e advirtan sobre os prexuízos para a saúde derivados do seu uso. Nestes establecementos exixirase a todas as persoas compradoras, salvo que sexa evidente que son maiores de idade, acreditar a dita idade mediante documento de valor oficial.

Artigo 32. *Limitacións ao consumo*

1. Prohíbese ás persoas menores de idade o consumo en calquera lugar ou espazo de produtos do tabaco e produtos relacionados co tabaco, de conformidade coas definicións do artigo 4, así como de calquera outro produto que os imite, induza a fumar ou simule a conduta de fumar.
2. Queda prohibido, ademais de nos lugares e espazos recollidos no artigo 7 da Lei 28/2005, do 26 de decembro, de medidas sanitarias fronte ao tabaquismo e reguladora da venda, a subministración, o consumo e a publicidade dos produtos de tabaco, o consumo de produtos de tabaco e produtos relacionados co tabaco nos seguintes:
 - a) Centros e dependencias das administracións públicas e entidades de dereito público, incluíndo tanto os espazos interiores como exteriores.
 - b) Marquesiñas de calquera transporte público.
 - c) Piscinas de uso público.
 - d) Nun radio de 50 metros nas zonas de acceso aos seguintes lugares:
 - 1º. Centros e dependencias das administracións públicas e entidades de dereito público.
 - 2º. Centros docentes e formativos, agás nos espazos ao aire libre dos centros universitarios e dos exclusivamente dedicados á formación de adultos, sempre que non sexan accesos inmediatos aos edificios ou ás beirarrúas circundantes.
 - 3º. Centros, servizos ou establecementos sanitarios. Esta prohibición non será aplicable nos espazos exteriores que formen parte da vía pública, agás que estean reservados para uso sanitario ou



institucional, estean expresamente sinalizados como espazo libre de fume e/ou se trate de zonas cedidas ou utilizadas polo propio centro para fins asistenciais.

CAPÍTULO III

Limitacións aplicables ao cánnabis, produtos, compoñentes ou derivados deste

Artigo 33. Limitacións á publicidade e ao patrocinio

1. A emisión nos medios de comunicación de titularidade autonómica de cine ou de series televisivas que conteñan imaxes relacionadas co cánnabis ou produtos, compoñentes ou derivados deste deberán conter unha mensaxe expresa previa á súa emisión sobre os efectos nocivos e prexudiciais para a saúde do consumo de tales substancias.
2. Quedan prohibidos o patrocinio e a publicidade da planta *Cannabis sativa* en medios e soportes aos que poidan ter acceso as persoas menores de idade.
3. Prohíbese asociar o consumo de cánnabis con comportamentos que expresen melloras no rendemento físico e laboral ou con beneficios para a saúde, propiedades terapéuticas, efectos sedantes ou estimulantes, e coa condución de vehículos, manexo de armas ou obxectos perigosos e, en termos xerais, con actividades de risco.
4. As tendas que vendan calquera produto relacionado co cánnabis ou co seu consumo non poderán expoñer no seu escaparate ou dirixir ningunha imaxe ao exterior da planta *Cannabis sativa* ou calquera produto, compoñente ou derivado desta.
5. Prohíbese regalar ou vender calquera tipo de *merchandising* coa imaxe identificativa do cánnabis á poboación menor de idade.

Artigo 34. Limitacións ao acceso a determinados establecementos

1. Prohíbese o acceso ás persoas menores de idade aos lugares ou aos establecementos vinculados coa produción, distribución ou consumo de cánnabis e produtos derivados, incluído o cannabidiol (en adiante, CBD).
2. Así mesmo, prohíbese o acceso ás persoas menores de idade ás tendas onde se vendan sementes, plantas de *Cannabis sativa* ou calquera outro produto relacionado, incluído o CBD.

CAPÍTULO IV

Limitacións aplicables ás bebidas enerxéticas

Artigo 35. Publicidade, promoción e patrocinio de bebidas enerxéticas

1. Prohíbese calquera forma directa, indirecta ou encuberta de publicidade, promoción ou patrocinio de bebidas enerxéticas dirixida ás persoas menores de idade.
2. Queda prohibida toda clase de publicidade de bebidas enerxéticas nos seguintes lugares e medios:



- a) Centros sanitarios.
- b) Centros docentes.
- c) Centros de acollida, de protección e de cumprimento de medidas xudiciais de persoas menores de idade.
- d) Centros de ocio infantil, parques multilecer ou outros centros de ocio e recreo dirixidos a persoas menores de idade.
- e) Centros ou establecementos que realizan actividades dirixidas a persoas menores de idade.
- f) Recintos ou locais destinados a espectáculos públicos e actividades recreativas ou nos que se realicen competicións ou actividades deportivas cando estean dirixidas a persoas menores de idade.
- g) Na vía pública nunha área de 100 metros dos centros docentes e dos centros de acollida, de protección e de cumprimento de medidas xudiciais de persoas menores de idade. A consellaría competente na materia de saúde pública publicará na súa web unha relación actualizada de centros aos que se refire este apartado.

3. Así mesmo, queda prohibida toda clase de publicidade de bebidas enerxéticas realizada a través dos seguintes medios:

- a) Publicacións de libros, revistas, folletos ou calquera outro impreso editados en Galicia dirixidos a persoas menores de idade.
- b) Cubertas exteriores, portada e contraportada de libros, revistas, folletos ou calquera outro impreso editados ou distribuídos en Galicia dirixidos a persoas menores de idade.
- c) Folletos, editados ou distribuídos en Galicia, non dirixidos a menores pero que inclúan produtos destinados a persoas menores de idade e que conteñan no seu interior promocións ou ofertas de bebidas enerxéticas para a súa venda en establecementos comerciais e de alimentación localizados en Galicia. Estas deberán situarse en páxinas separadas das destinadas a produtos para persoas menores de idade e incorporarán un código QR que remita a unha páxina web da consellaría competente na materia de saúde pública con mensaxes informativas e preventivas sobre o consumo de bebidas enerxéticas, ou, na súa falta, un texto coas mensaxes informativas e preventivas sobre o consumo de bebidas enerxéticas.

4. Prohíbese a promoción de bebidas enerxéticas, en establecementos onde estea autorizado o consumo no propio local, mediante prácticas que inciten ao consumo excesivo ou descontrolado.

5. Prohíbese que calquera bebida enerxética patrocine eventos dirixidos a persoas menores. No resto de actividades de patrocinio non poderán ofrecerse bebidas enerxéticas a persoas menores de idade nin poderán entregarse bens ou servizos relacionados con bebidas enerxéticas ou que leven marcas, símbolos ou distintivos que poidan identificar unha bebida enerxética.



Artigo 36. Acordos na materia de autolimitación da publicidade de bebidas enerxéticas

A Administración autonómica promoverá a formalización de acordos de autocontrol e autolimitación da publicidade de bebidas enerxéticas no ámbito das empresas, produtores ou as súas asociacións e distribuidoras dos ditos produtos, así como cos anunciantes, axencias e medios de publicidade que operen no seu territorio, co fin de lograr os obxectivos desta lei.

Artigo 37. Limitacións ao consumo, venda, subministración e transporte das bebidas enerxéticas

1. Quedan prohibidos o consumo, o transporte, a tenza ou a posesión de bebidas enerxéticas por persoas menores de idade, salvo cando o transporte, a tenza ou a posesión sexan por motivos laborais.

2. Quedan prohibidas a venda e a subministración de bebidas enerxéticas a persoas menores de idade. As persoas titulares e empregadas dos establecementos, así como calquera outra persoa que interveña na venda ou subministración de bebidas enerxéticas, exixirán a todas as persoas compradoras, salvo que sexa evidente que son maiores de idade, acreditar a dita idade mediante documento de valor oficial.

3. Quedan prohibidas a venda e a subministración de bebidas enerxéticas nos seguintes lugares:

a) Centros sanitarios.

b) Centros docentes.

c) Centros de acollida, de protección e de cumprimento de medidas xudiciais de persoas menores de idade.

d) Centros de ocio infantil, parques multilecer ou outros centros de ocio e recreo dirixidos a persoas menores de idade.

e) Todos aqueles centros que realizan actividades dirixidas a persoas menores de idade.

f) Recintos ou locais destinados a espectáculos públicos e actividades recreativas ou nos que se realicen competicións ou actividades deportivas cando estean dirixidas a persoas menores de idade.

4. Para os efectos do regulado nesta lei, incorrerán en responsabilidade as persoas maiores de idade que induzan persoas menores de idade ao consumo de bebidas enerxéticas, así como que lles vendan ou subministren bebidas enerxéticas ou que as compren para elas.

5. Para os efectos deste artigo, non será causa de exoneración de responsabilidade para as persoas subministradoras ou vendedoras a autorización escrita ou o consentimento de venda, subministración ou consumo de bebidas enerxéticas outorgado por pais, nais, titores ou titoras ou gardadores ou gardadoras legais ou de feito ás persoas menores de idade.



6. Nos establecementos comerciais onde se vendan bebidas enerxéticas pero non estea permitido consumilas habilitaranse espazos claramente diferenciados para a localización destas bebidas. Así mesmo, deberán estar separadas dos refrescos.

7. En todos os establecementos nos que estean autorizadas a venda e a subministración de bebidas enerxéticas, instalaranse en lugar visible carteis que, de acordo coas características que determine regulamentariamente a consellaría competente na materia de saúde pública, informen, en galego e en castelán, da prohibición de venda e subministración de bebidas enerxéticas ás persoas menores de idade e advirtan sobre os prexuízos para a saúde derivados do seu uso. Nestes establecementos exixirase a todas as persoas compradoras, salvo que sexa evidente que son maiores de idade, acreditar a dita idade mediante documento de valor oficial.

CAPÍTULO V

Adicións sen substancia

Artigo 38. *Condicións relativas á venda de videoxogos*

1. Os establecementos de venda deberán organizar os espazos separando de maneira clara e diferenciada os produtos en función da idade recomendada de cada videoxogo.

2. En todos os establecementos nos que estea autorizada a venda de videoxogos instalaranse en lugar visible carteis que, de acordo coas características que determine regulamentariamente a consellaría competente na materia de saúde pública, informen, en galego e en castelán, da existencia de sistemas de clasificación de contidos dos videoxogos.

TÍTULO III

Actuacións sanitarias ante intoxicacións por consumo de substancias psicoactivas

Artigo 39. *Actuacións sanitarias ante intoxicacións por consumo de substancias psicoactivas*

1. Os servizos sanitarios informarán e solicitarán a presenza dos e das proxenitoras ou das persoas que exerzan a titoría ou a garda legal cando atendan unha persoa menor de idade con motivo dunha intoxicación provocada polo consumo dalgunha substancia psicoactiva nos termos establecidos na normativa vixente na materia de autonomía do ou da paciente e de dereitos e obrigas na materia de información e documentación clínica. Así mesmo, proporcionaranlles asesoramento sobre a situación e recursos de axuda, tanto preventivos como asistenciais.

2. Ás persoas menores de idade atendidas por intoxicacións provocadas polo consumo dalgunha substancia psicoactiva realizaráselles unha avaliación integral, implicando os seus ou as súas proxenitoras, titores ou titoras ou gardadores ou gardadoras legais. Esta valoración incluírá unha anamnese dirixida á identificación de factores de risco psicosocial e unha avaliación psicopatolóxica que garanta a continuidade da súa atención nos dispositivos sanitarios, de considerarse necesario.

3. No suposto de que unha persoa menor de idade sexa atendida por segunda ou sucesivas ocasións con motivo dunha intoxicación provocada polo consumo dalgunha substancia psicoactiva ofreceráselle a posibilidade da súa incorporación a un programa de axuda, no que se recomendará



a participación da persoa adulta responsable, entendendo por tal o pai, a nai ou a persoa que exerza a tutoría ou a garda legal. Para os efectos desta lei, debe terse en conta que respecto dos nenos, nenas e adolescentes con medida de protección os ou as gardadoras legais son a familia acolledora e/ou o director ou a directora do centro no que resida a persoa menor.

4. No suposto de sospeita de ser obxecto dun intento de submisión química, con ou sen comisión de actos de violencia de xénero e/ou sexo non consentido, informárase as persoas proxenitoras ou persoas que exerzan a tutoría ou a garda legal e proporcionaráselles asesoramento sobre a situación e recursos de axuda.

Para tal efecto, considérase submisión química a administración de substancias psicoactivas a unha persoa sen o seu coñecemento ou consentimento, co obxectivo de alterar o seu estado de conciencia ou anular a súa vontade e facilitar a comisión dun delito.

5. Así mesmo, activaranse os mecanismos para a detección e a reparación de posibles situacións de risco, dando traslado aos servizos sociais comunitarios competentes para avaliar estas situacións, que adoptarán as medidas necesarias para a protección da persoa menor de idade.

TÍTULO IV Sistemas de información

Artigo 40. *Sistema de información sobre o consumo de substancias psicoactivas*

1. A consellaría competente na materia de saúde pública establecerá un sistema de información sobre o consumo de substancias psicoactivas, que deberá estar integrado no sistema de información de saúde de Galicia definido no artigo 71 da Lei 8/2008, do 10 de xullo.

2. A xestión do sistema de información sobre o consumo de substancias psicoactivas corresponderalle ao órgano directivo competente na materia de saúde pública, co apoio dos departamentos territoriais da consellaría competente.

3. O sistema de información sobre o consumo de substancias psicoactivas terá como finalidades:

a) Recadar, procesar, analizar e difundir información sobre os factores de risco e de protección, sobre a incidencia e prevalencia do consumo, sobre o seguimento e o control da aparición de novas substancias, sobre as actuacións na materia de prevención e sobre os centros e os programas dispoñibles, así como información relativa aos incumprimentos dos preceptos desta lei.

b) Servir para a definición daqueles indicadores que permitan a avaliación continuada das iniciativas e dos programas emprendidos en relación coa prevención das adiccións, tendo en conta as recomendacións internacionais.

c) Definir e recoller aquela información que permita coñecer, estudar e avaliar a situación epidemiolóxica do consumo de substancias psicoactivas e os progresos e avances na consecución dos obxectivos marcados por esta lei.



d) En cumprimento da lexislación vixente na materia de igualdade efectiva entre mulleres e homes, recoller a información necesaria que permita, no ámbito desta lei, a educación diferenciada sobre os riscos, as características e as necesidades de mulleres e homes, así como a formación contra a discriminación das mulleres.

e) Facilitar o intercambio de información relevante para a toma de decisións entre as distintas organizacións implicadas no desenvolvemento e na aplicación desta lei.

f) Todas aquelas outras funcións que se establezan regulamentariamente.

4. Os órganos da Administración local competentes para instruír e resolver os expedientes sancionadores pola comisión de infraccións previstas nesta lei deberán informar semestralmente os departamentos territoriais correspondentes da consellaría competente na materia de saúde pública, e vía rexistro electrónico, das inspeccións realizadas, das denuncias presentadas e dos expedientes sancionadores incoados. Esta información incluírá, de cara á correcta aplicación dos criterios de reincidencia e de reiteración na tipificación das infraccións, os feitos que se imputen, as infraccións que tales feitos constitúan e as sancións impostas, ou a súa substitución se é o caso, así como a data da firmeza da resolución sancionadora.

5. A consellaría competente na materia de saúde pública habilitará un espazo específico na súa páxina web corporativa co fin de facilitar as denuncias por parte da poboación daquelas entidades, centros, locais, establecementos ou actividades nos que se cometa calquera das infraccións especificadas nesta lei.

6. O tratamento de datos persoais respectará o establecido polo Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e á libre circulación destes datos e polo que se derroga a Directiva 95/46/CE (Regulamento xeral de protección de datos), así como pola Lei orgánica 3/2018, do 5 de decembro, de protección de datos persoais e garantía dos dereitos dixitais, e demais normativa vixente na materia.

Artigo 41. *Medidas de información no ámbito sanitario*

1. A información da intervención asistencial en relación co consumo de substancias psicoactivas deberá estar dispoñible nos sistemas de información do Sistema galego de saúde, para o seguimento do ou da paciente.

2. A través dos sistemas de información xestionados polo órgano directivo competente na materia de saúde pública, incluíranse preguntas para coñecer a incidencia e a prevalencia do consumo de substancias psicoactivas e das adiccións sen substancia.

3. A información derivada do seguimento da normativa sobre os produtos afectados por esta lei recollerase nos correspondentes plans anuais de inspección, que serán actualizados para incluír os espazos e os consumos regulados nesta normativa.



TÍTULO V Organización institucional

CAPÍTULO I Ordenación e coordinación entre administracións da Comunidade Autónoma de Galicia

Artigo 42. *Das competencias da Administración autonómica*

1. Corresponde á Administración xeral da Comunidade Autónoma o exercicio das seguintes competencias:

- a) O establecemento da política na materia de prevención de adiccións da Comunidade Autónoma de Galicia.
- b) A planificación e a creación de unidades administrativas ou órganos colexiados na materia de prevención das adiccións, así como a determinación da súa organización e réxime de funcionamento.
- c) A elaboración e a actualización do Plan na materia de trastornos adictivos de Galicia.
- d) O exercicio da potestade sancionadora nos termos previstos nesta lei.
- e) A adopción, en colaboración con outras administracións públicas, de todas aquelas medidas que sexan precisas para asegurar o cumprimento do establecido nesta lei.
- f) A adopción das medidas preventivas dirixidas a asegurar o cumprimento do establecido nesta lei.

2. Dentro da estrutura da Administración xeral da Comunidade Autónoma, corresponde á consellaría competente na materia de saúde pública:

- a) A cooperación ou a colaboración xeral coas administracións públicas, entidades privadas e institucións nas actuacións na materia de prevención das adiccións.
- b) O establecemento e a xestión do sistema de información sobre prevención de adiccións.

Artigo 43. *Das competencias dos concellos*

1. Para os efectos do establecido nesta lei, corresponde aos concellos da Comunidade Autónoma de Galicia exercer no seu ámbito territorial as seguintes competencias:

- a) Determinar os criterios que regulen a localización e os requisitos que deberán reunir os establecementos onde se subministren, vendan, dispensen ou consuman bebidas alcohólicas, así como a vixilancia e control deles.
- b) Determinar os criterios e as condicións de autorización de consumo de bebidas alcohólicas por persoas adultas nos espazos de dominio público que se atopen no seu ámbito territorial, así como



proceder ao asinamento de acordos con outras administracións para o cumprimento dos ditos criterios e condicións nos espazos de dominio público baixo a súa competencia.

c) Velar, no marco das súas competencias, polo cumprimento das diferentes medidas de control que establece esta lei, especialmente nas dependencias municipais.

d) Intervir desde os servizos sociais comunitarios nas situacións de risco para os nenos, nenas e adolescentes derivadas da materia regulada nesta norma.

e) Exercer a potestade sancionadora nos termos previstos nesta lei.

f) Adoptar as medidas preventivas dirixidas a asegurar o cumprimento do establecido nesta lei.

2. Ademais das sinaladas no número anterior, os concellos de máis de vinte mil habitantes terán as seguintes competencias e responsabilidades mínimas:

a) Elaborar, desenvolver e executar os obxectivos, as accións e os indicadores relacionados coa prevención de adiccións nos plans locais de saúde correspondentes e, en xeral, os programas e as actuacións nesta materia que se desenvolvan exclusivamente no seu ámbito, de acordo co establecido nesta lei e no Plan vixente na materia de trastornos adictivos de Galicia.

b) Elaborar e aprobar os plans correspondentes na materia de inspección e sancións.

c) Fomentar a participación social e apoiar as institucións sen ánimo de lucro que desenvolvan no municipio actuacións previstas no correspondente plan local de saúde.

CAPÍTULO II

Comisión na materia de prevención das adiccións das persoas menores de idade en Galicia

Artigo 44. Creación da Comisión na materia de prevención das adiccións das persoas menores de idade en Galicia

1. Créase a Comisión na materia de prevención das adiccións das persoas menores de idade en Galicia como órgano colexiado para o estudo, a coordinación e o asesoramento en materia da prevención das adiccións en persoas menores de idade en Galicia.

2. Esta comisión, que estará adscrita ao órgano directivo competente na materia de saúde pública, rexerase polo disposto na lexislación básica na materia de réxime xurídico do sector público, na Lei 16/2010, do 17 de decembro, de organización e funcionamento da Administración xeral e do sector público autonómico de Galicia, nesta lei e no seu regulamento de réxime interior.

Artigo 45. Composición e funcionamento

1. A Comisión na materia de prevención das adiccións das persoas menores de idade en Galicia estará composta por unha presidencia, unha vicepresidencia e seis vogalías, nomeadas pola persoa titular da consellaría con competencias na materia de saúde pública.



2. A presidencia corresponderá á persoa titular da dirección xeral con competencias na materia de saúde pública.

3. A vicepresidencia corresponderá á persoa titular do órgano administrativo, con nivel de subdirección xeral, que teña atribuídas as competencias na materia de estilos de vida saudable.

4. As vogalías estarán formadas por:

a) Unha persoa en representación da consellaría con competencias na materia de sanidade.

b) Unha persoa en representación da consellaría con competencias na materia de educación.

c) Unha persoa en representación da consellaría con competencias na materia de xuventude e protección da infancia.

d) Unha persoa en representación da consellaría con competencias na materia de xogo.

e) Unha persoa en representación das administracións locais galegas.

f) Unha persoa en representación das organizacións do terceiro sector que realizan o seu labor no ámbito da prevención das adiccións.

5. A secretaría desta comisión será exercida por un empregado ou empregada pública da consellaría con competencias na materia de saúde pública, designado ou designada pola comisión, que actuará con voz e sen voto.

6. A composición desta comisión respectará o principio de composición equilibrada de mulleres e homes nos termos establecidos na Lei 7/2023, do 30 de novembro, para a igualdade efectiva de mulleres e homes en Galicia.

Artigo 46. *Funcións*

Correspóndenlle a este órgano as seguintes funcións:

a) A análise da situación das adiccións na Comunidade Autónoma de Galicia.

b) A colaboración na definición das liñas de actuación prioritarias na prevención das adiccións en Galicia.

c) A promoción de medidas de coordinación das diferentes administracións públicas e organizacións que participan na prevención das adiccións en Galicia.

d) A promoción de medidas de colaboración entre os sistemas educativo, sanitario e de protección social no ámbito da prevención das condutas adictivas.

e) Todas aquelas outras funcións que se establezan regulamentariamente.



CAPÍTULO III

Iniciativa social

Artigo 47. Organizacións non gobernamentais e entidades sociais

1. A Administración autonómica fomentará e apoiará as iniciativas sociais e a colaboración coas organizacións non gobernamentais e entidades sociais, considerando o seu importante papel nesta materia.

2. Serán ámbitos preferentes de actuación das organizacións non gobernamentais e entidades sociais:

a) A concienciación social acerca da problemática xerada polas adiccións.

b) A prevención nos ámbitos educativo, familiar, social e comunitario.

TÍTULO VI

A inspección

Artigo 48. Inspección

1. A Administración autonómica e a local exercerán funcións de inspección e control do cumprimento do disposto nesta lei no eido das súas respectivas competencias. O persoal ao servizo destas administracións que desenvolva actividades de inspección terá a condición de autoridade sanitaria no desempeño das súas funcións e para os efectos desta lei.

No exercicio das súas funcións, as autoridades sanitarias e os seus axentes poderán solicitar o apoio e a cooperación doutras funcionarias e funcionarios públicos, incluídos os das forzas e corpos de seguridade, así como de calquera persoa física, institución ou persoa xurídica.

2. O persoal funcionario que actúe no exercicio das funcións de inspección previstas nesta lei, acreditando a súa identidade, estará autorizado para:

a) Entrar libremente, e sen previa notificación, en calquera momento, en todo centro, servizo ou establecemento suxeito a esta lei.

b) Realizar as probas, as investigacións ou os exames necesarios para comprobar o cumprimento desta lei e das normas que se diten para o seu desenvolvemento.

c) Realizar cantas actuacións sexan necesarias para o cumprimento das funcións de inspección que exerza.

3. Con base no deber de colaboración entre as administracións públicas e no principio de cooperación, a Administración autonómica e as administracións locais poderán promover a adopción de acordos e convenios para optimizar o uso de recursos públicos e asegurar a coherencia das actuacións realizadas na materia de inspección.



Artigo 49. *Actas*

Os feitos constatados polo persoal de inspección deberán reflectirse nunha acta na cal se consignarán todas e cada unha das circunstancias que sexan precisas para a mellor constatación dos feitos obxecto da inspección e na que as persoas interesadas poderán facer constar as súas observacións e a súa desconformidade. A acta será asinada polas persoas comparecentes, sen que o seu asinamento implique a aceptación do contido da acta. No caso de negativa das persoas comparecentes a asinar a acta, esta será igualmente válida. Entregarase ás persoas comparecentes unha copia da acta. As actas nas que, observándose os requisitos legais correspondentes, se recollan os feitos constatados polos inspectores farán proba deles, salvo que se acredite o contrario.

TÍTULO VII **Infraccións e sancións**

CAPÍTULO I **Das infraccións**

Artigo 50. *Clasificación das infraccións*

As infraccións administrativas tipificadas nesta lei clasifícanse en leves, graves e moi graves.

Artigo 51. *Infraccións leves*

Constitúen infraccións leves:

- a) O consumo de bebidas alcohólicas por persoas menores de idade.
- b) O transporte, a tenza ou a posesión de bebidas alcohólicas por persoas menores de idade, salvo cando se realice por motivos laborais.
- c) O incumprimento da prohibición de exhibición de imaxes con distintivos de bebidas alcohólicas establecida no artigo 24.
- d) O incumprimento das obrigas de información mediante anuncios ou carteis recollidas no artigo 26.
- e) O consumo de bebidas alcohólicas nos lugares especificados no artigo 27.2.
- f) O incumprimento por parte das persoas menores de 16 anos da prohibición de acceso aos establecementos de lecer e entretemento establecida no artigo 29.
- g) O consumo de produtos de tabaco ou produtos relacionados co tabaco por persoas menores de idade, así como de calquera outro produto que os imite, induza a fumar ou simule a conduta de fumar.
- h) A tenza ou o transporte por persoas menores de idade de produtos do tabaco ou produtos relacionados co tabaco, salvo cando se realice por motivos laborais.



i) O incumprimento, nos establecementos nos que estean autorizadas a venda e a subministración de produtos do tabaco e produtos relacionados co tabaco, da obriga de instalar carteis que informen da prohibición de venda ás persoas menores de idade e advirtan sobre os prexuízos para a saúde derivados do seu uso, nos termos establecidos no artigo 31.3.

j) O consumo de produtos do tabaco ou relacionados co tabaco nos lugares especificados no artigo 32.2.

k) A exposición, en tendas que vendan calquera produto relacionado co cánnabis ou co seu consumo, destes produtos no seu escaparate, así como a exposición de imaxes dirixidas ao exterior da planta *Cannabis sativa* ou de calquera produto ou derivado desta.

l) O consumo, o transporte, a tenza ou a posesión de bebidas enerxéticas por persoas menores de idade, salvo cando o transporte, a tenza ou a posesión sexan por motivos laborais.

m) O incumprimento, nos establecementos nos que estean autorizadas a venda e a subministración de bebidas enerxéticas, da obriga de instalar carteis que informen da prohibición de venda e subministración destas ás persoas menores de idade e advirtan sobre os prexuízos para a saúde derivados do seu uso, nos termos establecidos no artigo 37.7.

n) A obstrución do labor inspector mediante calquera acción ou omisión que o perturbe ou o atrase.

ñ) O mero atraso no cumprimento das obrigas de información, comunicación ou comparecencia por requirimento da autoridade competente.

o) Todas aquelas accións ou omisións contrarias a esta lei que se cometan por simple negligencia e non comporten un prexuízo directo para a saúde individual ou colectiva.

p) Calquera outro incumprimento das obrigas previstas nesta lei que non se tipifique como infracción grave ou moi grave.

Artigo 52. *Infraccións graves*

Constitúen infraccións graves:

a) A venda, a subministración ou a indución ao consumo de bebidas alcohólicas a persoas menores de idade, así como a súa adquisición para entregárllelas a elas.

b) O incumprimento das restricións contidas no artigo 20, referentes á publicidade, á promoción e ao patrocinio de bebidas alcohólicas.

c) O incumprimento dos criterios que deben rexer a publicidade, a promoción e o patrocinio de bebidas alcohólicas, previstos no artigo 22.

d) O incumprimento das restricións contidas no artigo 33, referentes á publicidade e ao patrocinio de cánnabis e de produtos, compoñentes ou derivados daquel.



e) O incumprimento das restricións contidas no artigo 35, referentes á publicidade, á promoción e ao patrocinio de bebidas enerxéticas.

f) O incumprimento, por parte das persoas titulares dos establecementos ou organizadoras das actividades, da prohibición de entrada das persoas menores de 16 anos nos establecementos destinados a actividades de ocio e entretemento, así como nos espazos destinados a espectáculos musicais, segundo o previsto no número 1 do artigo 29, excepto se van acompañadas de persoa maior de idade con responsabilidade sobre elas.

g) O incumprimento pola persoa titular do establecemento ou organizadora da actividade das prohibicións contidas no artigo 29.2 no que respecta ao desenvolvemento das sesións permitidas destinadas a persoas menores de idade maiores de 14 anos.

h) O incumprimento por parte das industrias relacionadas coas materias reguladas nesta lei das condicións exixidas no artigo 23, no que respecta á organización de actividades en centros docentes, públicos e privados, e/ou con organizacións infantís e xuvenís.

i) A venda e a subministración de bebidas alcohólicas nos lugares especificados no artigo 25.4.

j) A venda e a subministración de bebidas alcohólicas a través de máquinas expendedoras que incumpran o disposto no artigo 25.7.

k) A venda e a subministración de bebidas alcohólicas no horario nocturno definido no artigo 4.g).

l) O incumprimento das limitacións ao acceso das persoas menores de idade a lugares vinculados á produción das bebidas alcohólicas previstas no artigo 28.

m) A venda ou a entrega ás persoas menores de idade de produtos do tabaco e produtos relacionados co tabaco, así como de calquera outro produto que imite e induza a fumar ou simule a conduta de fumar.

n) Permitir fumar ou consumir produtos do tabaco ou relacionados co tabaco nos lugares nos que existe prohibición de facelo, segundo o artigo 32 desta lei.

ñ) Habilitar zonas para fumar ou consumir produtos do tabaco ou produtos relacionados co tabaco en establecementos e en lugares onde non estea permitida a súa habilitación.

o) O patrocinio e a publicidade da planta *Cannabis sativa* en medios e soportes aos que poidan ter acceso as persoas menores de idade.

p) Regalar ou vender calquera tipo de *merchandising* coa imaxe identificativa do cánnabis á poboación, independentemente de cal sexa a súa idade.

q) Permitir o acceso ás persoas menores de idade aos lugares ou establecementos vinculados coa produción, distribución ou consumo de cánnabis e produtos derivados, incluído o CBD, así como ás tendas onde se vendan sementes, plantas de *Cannabis sativa* ou calquera outro produto relacionado, incluído o CBD.



r) A venda, a subministración ou a indución ao consumo de bebidas enerxéticas a persoas menores de idade, así como a súa adquisición para entregárllelas a elas.

s) O incumprimento da obriga por parte de establecementos comerciais de venda de habilitar espazos específicos e claramente diferenciados para a localización das bebidas enerxéticas, de acordo co disposto no artigo 37.6.

t) O patrocinio de concertos, festivais, romarías ou calquera acto lúdico dirixido a persoas menores de idade por produtos que conteñan bebidas alcohólicas, tabaco, cánnabis ou bebidas enerxéticas.

u) O incumprimento da obriga de informar por parte dos medios de comunicación de titularidade autonómica dos efectos nocivos e prexudiciais para a saúde do consumo de tabaco e/ou produtos relacionados co tabaco, cánnabis e produtos, compoñentes ou derivados deste, con carácter previo á emisión de cine ou de series televisivas que conteñan imaxes relacionadas con tales substancias.

v) A negativa absoluta a facilitar información ou a prestar colaboración, así como facilitar información falsa de xeito deliberado, ás autoridades sanitarias, aos seus axentes ou ao persoal das forzas e corpos de seguridade mediante a negativa a someterse aos controis, subministrar datos, facilitar información ou prestar colaboración.

w) O incumprimento da prohibición de consumir en grupo bebidas alcohólicas na vía pública, nos parques e prazas públicas e noutros espazos de tránsito público.

x) A comisión dunha infracción leve cando, no ano anterior, o mesmo suxeito fose sancionado pola comisión de dúas ou mais infraccións leves e a resolución ou resolucións sancionadoras sexan firmes na vía administrativa.

Artigo 53. *Infraccións moi graves*

Constitúen infraccións moi graves:

a) O incumprimento dos requirimentos específicos ou das medidas provisionais que adopten as autoridades sanitarias competentes cando concorra dano grave para a saúde das persoas.

b) A resistencia, a coacción, a ameaza, a inxuria, o desacato ou calquera outra forma de presión exercida sobre os membros dos corpos e forzas de seguridade e/ou o persoal funcionario que exerza funcións de inspección.

c) O incumprimento consciente e deliberado dos requisitos, das obrigas ou das prohibicións establecidas nesta lei, ou calquera comportamento doloso, sempre que ocasionen alteración, dano ou risco grave para a saúde dos e das menores de idade.

d) A comisión dunha infracción grave, cando, no prazo dos cinco anos anteriores, o mesmo suxeito xa fose sancionado pola comisión dunha infracción grave mediante resolución firme na vía administrativa.



Artigo 54. *Responsables*

1. Das diferentes infraccións será responsable o seu autor ou autora, entendendo por tal a persoa física ou xurídica que cometa os feitos tipificados como tales.

2. No caso das infraccións tipificadas nesta lei relativas ao incumprimento das obrigas de información sobre a prohibición de venda e de subministración de bebidas alcohólicas, enerxéticas, tabaco, produtos do tabaco e de DSLN e produtos relacionados co tabaco a persoas menores de idade e sobre os prexuízos para a saúde derivados do seu consumo, serán responsables as persoas titulares dos establecementos nos que se cometa a infracción.

3. No suposto de venda e de subministración de tales substancias a menores de 18 anos, así como no suposto de permitir o seu consumo nos lugares e nos establecementos nos que exista prohibición, responderá a persoa titular do local, centro ou establecemento no que se cometa a infracción, ou, na súa falta, o empregado ou a empregada daquela que estiver a cargo do establecemento ou centro no momento de cometerse a infracción. Se a persoa titular do local, centro ou establecemento for unha administración pública, responderá a dita administración, sen prexuízo de que esta exixa ás súas autoridades e demais persoal ao seu servizo a responsabilidade en que incorresen.

4. No caso de infraccións na materia de publicidade, será considerado responsable solidario, ademais da empresa publicitaria, o beneficiario ou beneficiaria da publicidade, entendendo por tal o titular da marca ou do produto anunciado, así como a persoa titular do establecemento, medio de comunicación ou espazo no que se emite o anuncio.

5. Cando o cumprimento dunha obriga establecida por unha norma con rango de lei corresponda a varias persoas conxuntamente, responderán de forma solidaria das infraccións que, se é o caso, se cometan e das sancións que se impoñan. Non obstante, cando a sanción sexa pecuniaria e for posible, individualizárase na resolución en función do grao de participación de cada responsable.

6. Das infraccións cometidas por menores de idade serán responsables subsidiarios os seus pais e nais, os titores ou titoras e os gardadores ou gardadoras legais ou de feito, por esta orde, en razón do incumprimento da obriga imposta a eles ou elas de previr a comisión de infraccións administrativas que se imputasen ás persoas menores de idade. A responsabilidade subsidiaria virá referida a sufragar a contía pecuniaria da multa imposta.

7. Sen prexuízo da responsabilidade civil subsidiaria dos pais e nais ou titores ou titoras polas accións das persoas menores de idade que dependan deles ou delas, aqueles ou aquelas serán tamén responsables directos e solidarios das infraccións cometidas polas persoas menores de idade, sempre que, pola súa banda, constase dolo, culpa ou negligencia, incluída a simple inobservancia.

8. Así mesmo, e en función das distintas infraccións, tamén serán responsables delas as persoas organizadoras das actividades nas que se cometa a infracción ou, na súa ausencia, o persoal empregado que estea ao seu cargo.



CAPÍTULO II

Das sancións

Artigo 55. *Criterios para a gradación das sancións*

Para a determinación da contía das sancións previstas nesta lei terase en consideración o principio de proporcionalidade, mediante a aplicación dos seguintes criterios de gradación:

- a) A transcendencia da infracción.
- b) O grao de culpabilidade ou a existencia de intencionalidade.
- c) A natureza dos prexuízos causados.
- d) A reincidencia e a continuidade ou a persistencia na conduta infractora.
- e) A idade das persoas responsables.
- f) O volume de negocio e os beneficios obtidos pola conduta.
- g) O grao de difusión da publicidade.

Artigo 56. *Sancións*

1. As infraccións tipificadas nesta lei sancionaranse con multas conforme a seguinte gradación:

a) Infraccións leves:

- 1º. Grao mínimo: de 200 ata 601,01 euros.
- 2º. Grao medio: de 601,02 a 1.803,04 euros.
- 3º. Grao máximo: de 1.803,05 a 3.005,06 euros.

b) Infraccións graves:

- 1º. Grao mínimo: de 3.005,07 a 6.010,12 euros.
- 2º. Grao medio: de 6.010,13 a 10.517,71 euros.
- 3º. Grao máximo: de 10.517,72 a 15.025,30 euros.

c) Infraccións moi graves:

- 1º. Grao mínimo: de 15.025,31 a 120.202,42 euros.
- 2º. Grao medio: de 120.202,43 a 360.607,26 euros.



3º. Grao máximo: de 360.607,27 a 601.012,11 euros.

2. Poderán superarse os límites fixados ata acadar o quíntuplo do valor dos produtos ou dos servizos obxecto da infracción.

Artigo 57. *Substitución das sancións*

1. A autoridade competente para impoñer as sancións leves e graves recollidas nesta lei poderá decidir, cando así sexa solicitado pola persoa infractora ou o seu ou a súa representante legal, a substitución da sanción económica pola inclusión en programas preventivos ou asistenciais ou pola realización de traballos en beneficio da comunidade, preferentemente relacionados coa conduta infractora, de acordo co réxime que se prevexa regulamentariamente e que deberá determinar o criterio de equivalencia que resulte aplicable e o procedemento para facer efectivos os traballos ou a realización dos programas impostos, así como as condicións para o desenvolvemento destes.

2. A resolución sancionadora que se dite recollerá expresamente a sanción económica que corresponde e a medida acordada en substitución daquela. No caso de que a persoa infractora rexeite estas medidas, deberá comunicalo por escrito ao órgano competente para resolver no prazo de dez días hábiles. Neste caso, impoñerase a sanción económica prevista para ese tipo de infracción. No caso de non efectuar a dita comunicación ou non facela en prazo, entenderase que acepta expresamente a medida substitutoria imposta.

Artigo 58. *Competencia para o exercicio da potestade sancionadora*

1. Corresponde aos concellos a competencia para incoar, instruír e resolver os expedientes sancionadores pola comisión das infraccións leves tipificadas no artigo 51.

2. Corresponde á Administración autonómica a competencia para incoar, instruír e resolver os expedientes sancionadores polas infraccións graves e moi graves tipificadas nos artigos 52 e 53, respectivamente.

Os órganos autonómicos competentes para o exercicio da potestade sancionadora nos supostos previstos no apartado anterior son:

a) A persoa titular do departamento territorial correspondente da consellaría competente na materia de saúde pública, cando se trate de infraccións graves.

b) A persoa titular da consellaría competente na materia de saúde pública, cando se trate de infraccións moi graves.

3. Sen prexuízo do establecido no número 1, os departamentos territoriais correspondentes da consellaría competente na materia de saúde pública asumirán a incoación, a instrución e a resolución dos procedementos sancionadores polas infraccións previstas no número 1 no suposto de falta de actuacións dos concellos ante as denuncias presentadas pola cidadanía ou derivadas das actuacións de inspección, unha vez instados a actuar polos órganos competentes da Comunidade Autónoma e transcorrido o prazo concedido, que en ningún caso poderá ser inferior



a un mes desde a recepción do requirimento sen que se producise a notificación ao órgano competente da Administración xeral da Comunidade Autónoma da incoación do correspondente procedemento sancionador.

Artigo 59. *Prescripción de infraccións e de sancións*

1. As infraccións tipificadas nesta lei como leves prescribirán ao ano, as graves aos tres anos e as moi graves aos cinco anos.

O prazo de prescripción das infraccións comezará a contar desde o día no que a infracción se cometeu. No caso de infraccións continuadas, o prazo comezará a contar desde o momento da finalización da actividade ou do último acto con que a infracción se consuma. No caso de que os feitos ou as actividades constitutivos de infracción sexan descoñecidos por carecer de signos externos, o devandito prazo computarase desde que estes se manifestasen.

Interromperá a prescripción a iniciación, co coñecemento da persoa interesada, dun procedemento sancionador, e reiniciarase o prazo de prescripción se o expediente sancionador estiver paralizado durante máis dun mes por causa non imputable á persoa presuntamente responsable.

2. As sancións impostas pola comisión de infraccións leves prescribirán ao ano, as impostas por infraccións graves aos tres anos e as impostas por infraccións moi graves aos cinco anos.

O prazo de prescripción das sancións comezará a contar desde o día seguinte a aquel en que sexa executable a resolución pola cal se impón a sanción ou transcorre o prazo para recorrer contra ela.

Interromperá a prescripción a iniciación, co coñecemento da persoa interesada, do procedemento de execución, e volverá transcorrer o prazo se aquel está paralizado durante máis dun mes por causa non imputable á persoa infractora.

No caso de desestimación presunta do recurso de alzada interposto contra a resolución pola que se impón a sanción, o prazo de prescripción da sanción comezará a contar desde o día seguinte a aquel no que finalice o prazo legalmente previsto para a resolución do dito recurso.

CAPÍTULO III

Procedemento sancionador

Artigo 60. *Incoación do procedemento sancionador*

As infraccións tipificadas nesta lei serán obxecto das sancións administrativas correspondentes, logo da instrución do oportuno procedemento conforme os principios establecidos na Lei 40/2015, do 1 de outubro, de réxime xurídico do sector público, e a regulación procedemental contida na Lei 39/2015, do 1 de outubro, do procedemento administrativo común das administracións públicas.

Artigo 61. *Medidas provisionais previas á apertura do expediente sancionador*

1. Con anterioridade á iniciación do expediente sancionador que corresponda, o órgano autonómico ou local competente poderá adoptar, de oficio ou por instancia de parte e de forma



motivada, por razóns de urxencia inaprazable e para a protección provisional dos intereses implicados, as medidas provisionais previas que resulten necesarias e proporcionadas cando exista risco grave ou perigo inminente para a seguridade ou a saúde das persoas.

2. No caso de concorrer algún dos supostos previstos no número anterior, os órganos competentes poderán adoptar algunha ou algunhas das seguintes medidas:

a) A suspensión de autorizacións, permisos, licenzas e outros títulos expedidos polas autoridades administrativas e a suspensión do espectáculo ou da actividade de que se trate, se é o caso.

b) O desaloxo, a clausura e o precinto do establecemento aberto ao público.

3. As medidas adoptaranse mediante resolución motivada, respectando sempre o principio de proporcionalidade e logo da audiencia ás persoas interesadas. O trámite de audiencia poderase omitir nos casos de extraordinaria urxencia debidamente xustificados na resolución.

4. As medidas provisionais adoptadas deberán ser confirmadas, modificadas ou levantadas no acordo de iniciación do procedemento sancionador, que se deberá efectuar dentro dos quince días seguintes á adopción daquelas.

5. En todo caso, estas medidas quedarán sen efecto se non se inicia o procedemento no citado prazo ou cando o acordo de iniciación non conteña un pronunciamento expreso sobre elas.

6. A Administración competente para adoptar as medidas previstas neste artigo será a mesma que teña atribuída a competencia para a incoación do procedemento sancionador que corresponda.

Nos casos de competencia autonómica, o órgano competente da Administración xeral da Comunidade Autónoma de Galicia para adoptar as ditas medidas será o que teña atribuída a competencia para incoar o correspondente procedemento sancionador ou o órgano instructor.

7. Tendo en conta a afectación ás competencias autonómicas, a Administración autonómica poderá adoptar as medidas provisionais previas en supostos de competencia dos concellos, de acordo co previsto no número anterior, á custa e en substitución destes, no caso de inhibición da entidade local, logo do requirimento a esta que non sexa atendido no prazo indicado para o efecto, que en ningún caso poderá ser inferior a un mes. A non atención do requirimento por parte da entidade local exixirá a alegación dunha causa xustificada e debidamente motivada.

Tamén poderá adoptar as citadas medidas por razóns de urxencia inaprazable e extraordinaria que así o xustifiquen, e, neste caso, as medidas deberán ser postas en coñecemento inmediato do concello respectivo.

O órgano competente da Administración xeral da Comunidade Autónoma de Galicia para adoptar as medidas provisionais previas, nos supostos previstos neste punto, será o que teña atribuída a competencia para a incoación de expedientes sancionadores derivados de infraccións graves.



Artigo 62. Medidas provisionais durante o procedemento sancionador

1. Unha vez incoado o procedemento sancionador, o órgano administrativo competente para resolvelo poderá adoptar, de oficio ou por instancia de parte, en calquera momento, mediante resolución motivada e logo da audiencia ás persoas interesadas, as medidas provisionais que considere oportunas para asegurar a eficacia da resolución que se poida ditar, así como para a salvagarda da saúde, de existiren elementos de xuízo suficientes para iso, de acordo cos principios de proporcionalidade, efectividade e menor onerosidade.

O trámite de audiencia previa poderase omitir no caso de urxencia, que deberá estar debidamente motivada na resolución que determine a adopción das medidas provisionais. Nestes casos, efectuarase un trámite de audiencia con posterioridade á adopción da medida.

2. As medidas provisionais deberán ser proporcionadas á natureza e á gravidade das infraccións cometidas, e poderán consistir nalgunha das previstas no artigo 65 ou en calquera outra que asegure a eficacia da resolución que se poida ditar. Non se poderán adoptar medidas provisionais que poidan causar prexuízo de difícil ou imposible reparación ás persoas interesadas ou que impliquen violación de dereitos amparados polas leis.

3. As medidas provisionais poderán ser alzadas ou modificadas durante a tramitación do procedemento, de conformidade co disposto na Lei 39/2015, do 1 de outubro, do procedemento administrativo común das administracións públicas. En todo caso, extinguiranse coa eficacia da resolución administrativa que poña fin ao procedemento.

Artigo 63. Medidas de adopción directa polos axentes das forzas e corpos de seguridade

1. No caso de incumprimento dalgunha das prohibicións establecidas nesta lei para as bebidas alcohólicas que comporte un risco grave ou perigo inminente para as persoas e os bens ou a convivencia entre a cidadanía, os axentes dos corpos e forzas de seguridade, de oficio ou por petición dos órganos competentes para incoar ou resolver os correspondentes procedementos sancionadores, do persoal pertencente aos corpos de inspección, ou en virtude de denuncia pública, poderán adoptar de forma directa, logo do requirimento ás persoas responsables e no caso de que aquel non sexa atendido, as seguintes medidas:

a) A suspensión inmediata da actividade e o desaloxo e o precinto dos establecementos abertos ao público, así como o depósito, a retención ou a inmovilización das bebidas alcohólicas.

b) Aqueloutras medidas que se consideren necesarias, atendendo ás circunstancias concorrentes en cada caso, para garantir a seguridade das persoas e dos bens e a convivencia entre a cidadanía, e que garden a debida proporción atendendo aos bens e aos dereitos obxecto de protección.

2. No caso de que os axentes adopten as medidas indicadas no número anterior, deberán comunicalo inmediatamente ao órgano competente para adoptar as medidas provisionais previas pertinentes, que deberá confirmalas, modificalas ou levantalas no prazo de dous días hábiles desde a indicada comunicación. O incumprimento deste prazo comporta automaticamente o levantamento das medidas adoptadas.



3. Se o órgano indicado no número anterior ratifica as medidas adoptadas, o réxime de confirmación, modificación ou levantamento posterior rexerá polo que dispón o artigo 61.

4. O disposto nos números anteriores enténdese sen prexuízo das medidas que poida adoptar a Administración xeral do Estado no exercicio das súas competencias.

Artigo 64. *Resolución do procedemento sancionador*

1. O prazo máximo no que debe notificarse a resolución do procedemento sancionador será dun ano desde a data do acordo de incoación. Transcorrido o prazo indicado sen que se notifícase a correspondente resolución, producirase a caducidade do procedemento nos termos e cos efectos previstos na lexislación do procedemento administrativo común.

2. Se as condutas sancionadas causan danos ou prexuízos á Administración, a resolución do procedemento poderá impoñer á persoa infractora a reposición ao seu estado orixinario da situación alterada pola infracción, incluíndo a limpeza da vía pública, e a indemnización polos danos e perdas causados.

3. Se a sanción viñer motivada pola falta de adecuación da actividade ou do establecemento aos requisitos establecidos pola normativa vixente, a resolución sancionadora incluírá un requirimento para que a persoa sancionada leve a cabo as actuacións necesarias para regularizar a situación da actividade ou do establecemento do que é titular.

Artigo 65. *Execución forzosa das resolucións sancionadoras*

1. A execución forzosa das resolucións sancionadoras, unha vez que poñan fin á vía administrativa, corresponderá ao órgano competente para a incoación do procedemento.

2. Nos casos nos que a resolución sancionadora inclúa un requirimento para que a persoa sancionada leve a cabo as actuacións necesarias para regularizar a situación da actividade ou do establecemento do que é titular, o órgano competente para a execución poderá impoñer a aquela multas coercitivas dun 10 por cento da contía da sanción máxima fixada para a infracción cometida por cada día que pase desde o vencemento do prazo outorgado para o cumprimento do requirimento sen que se realizasen as actuacións ordenadas.

Disposición adicional primeira. *Actuacións inspectoras*

As funcións inspectoras que esta lei atribúe aos órganos e ás unidades administrativas da consellaría competente na materia de saúde pública corresponderán ao corpo facultativo superior da Xunta de Galicia, escala de saúde pública e administración sanitaria.

Disposición adicional segunda. *Actualización das contías das sancións*

As contías das sancións establecidas nesta lei poderán ser actualizadas polo Consello da Xunta de Galicia conforme os criterios establecidos na normativa de desindexación.



Disposición adicional terceira. *Festas de interese turístico*

Quedan permitidas a publicidade e a promoción de bebidas alcohólicas dirixidas a persoas maiores de idade cando aquelas se realicen no marco das festas que contén coa declaración de interese turístico, de acordo co establecido no Decreto 4/2015, do 8 de xaneiro, polo que se regula a declaración de festas de interese turístico de Galicia, e sexa conforme co establecido nos artigos 20 e 22 desta lei.

Disposición adicional cuarta. *Financiamento*

A constitución e a posta en funcionamento da Comisión na materia de prevención das adicións das persoas menores en Galicia non xerará aumento dos créditos orzamentarios asignados á consellaría con competencias na materia de sanidade.

Disposición transitoria única. *Réxime transitorio dos procedementos sancionadores*

1. Os procedementos sancionadores iniciados antes da entrada en vigor desta lei rexeranse pola normativa vixente no momento da súa iniciación.

2. Os actos e as resolucións pendentes de execución que fosen ditados no marco de procedementos sancionadores iniciados con anterioridade á entrada en vigor desta lei pendentes de execución á súa entrada en vigor rexeranse pola normativa vixente no momento no que se ditaron.

Disposición derogatoria única. *Derrogación normativa*

1. Quedan derogadas as disposicións que a continuación se citan, así como todas aquelas de igual ou inferior rango que se opoñan ao disposto nesta lei:

- a) O capítulo II do título I da Lei 2/1996, do 8 de maio, sobre drogas.
- b) A Lei 11/2010, do 17 de decembro, de prevención do consumo de bebidas alcohólicas en menores de idade.
- c) O Decreto 75/2001, do 22 de marzo, sobre control sanitario da publicidade, promoción, subministración, venda e consumo de produtos do tabaco.

2. Manteñen a súa vixencia, no que non resulte incompatible con esta lei:

- a) A Lei 2/1996, do 8 de maio, sobre drogas, excepto o capítulo II do título I, de acordo co disposto no número 1.
- b) O Decreto 88/2014, do 3 de xullo, polo que se regula o sistema de substitución de sancións impostas por incumprimento da Lei 11/2010, do 17 de decembro, de prevención do consumo de bebidas alcohólicas en menores de idade e se establecen os criterios básicos dos programas preventivos que dela derivan.



c) A Orde do 1 de marzo de 2012 pola que se regula a sinalización das limitacións no consumo, venda e subministración de bebidas alcohólicas en locais comerciais de Galicia.

Disposición derradeira primeira. *Modificación da Lei 8/2008, do 10 de xullo, de saúde de Galicia*

Modifícase a Lei 8/2008, do 10 de xullo, de saúde de Galicia, nos seguintes termos:

Un. Modifícase o número 15 do artigo 34, que queda coa seguinte redacción:

«15. Establecer prohibicións, limitacións e estratexias de prevención do consumo de bebidas alcohólicas para avanzar na desnormalización do seu consumo polas persoas menores de idade.».

Dous. Suprímese a letra b) do artigo 41 *bis*, que queda sen contido.

Tres. Modifícase a letra c) do artigo 42 *bis*, que queda coa seguinte redacción:

«c) A realización das condutas previstas nas alíneas a), e), g), h), i), j), k), l) e m) do artigo 41 *bis*, cando poidan producir un risco ou un dano grave para a saúde da poboación, sempre que non sexan constitutivas de infracción moi grave.».

Disposición derradeira segunda. *Desenvolvemento regulamentario*

Habílitate o Consello da Xunta de Galicia para ditar cantas normas sexan precisas para o desenvolvemento desta lei.

Disposición derradeira terceira. *Entrada en vigor*

Esta lei entrará en vigor aos dous meses da súa publicación no *Diario Oficial de Galicia*.

Santiago de Compostela, 19 de novembro de 2025

María Encarnación Amigo Díaz

María Montserrat Prado Cores

María Elena Espinosa Mangana

Armando Ojea Bouzo

Acordo da Mesa do Parlamento, do 25 de novembro de 2025, polo que se admite a trámite o proxecto de lei de modificación da Lei 8/2008, do 10 de xullo, de saúde de Galicia, pola que se establecen medidas de prevención e protección integral contra a violencia no Sistema de saúde de Galicia, e se abre o prazo de presentación de emendas

A Mesa do Parlamento, na súa sesión do día 25 de novembro de 2025, adoptou o seguinte acordo: Admisión a trámite e apertura do prazo de presentación de emendas

- 39099 (12/PL-000012)

Presidencia da Xunta de Galicia

Proxecto de lei de modificación da Lei 8/2008, do 10 de xullo, de saúde de Galicia, pola que se establecen medidas de prevención e protección integral contra a violencia no Sistema de saúde de Galicia



Examinado o Proxecto de lei de modificación da Lei 8/2008, do 10 de xullo, de saúde de Galicia, pola que se establecen medidas de prevención e protección integral contra a violencia no Sistema de saúde de Galicia, e logo de verificar que reúne a documentación e os antecedentes previstos no artigo 111 do Regulamento, a Mesa, por unanimidade, acorda:

1º. Admitir a trámite o devandito proxecto de lei polo procedemento lexislativo ordinario.

2º. Asignalo, oída a Xunta de Portavoces, na súa reunión do 25 de novembro de 2025, á Comisión 5ª, Sanidade, Política Social e Emprego, e ordenar a súa publicación no *Boletín Oficial do Parlamento de Galicia*.

3º. Abrir o prazo regulamentario de 15 días hábiles para a presentación de emendas, que comezará a contar a partir do día seguinte ao da publicación no *Boletín Oficial do Parlamento de Galicia*. O prazo remata o día 16 de decembro de 2025, ás 18.30 horas.

Santiago de Compostela, 25 de novembro de 2025

Miguel Ángel Santalices Vieira


Presidente





XUNTA
DE GALICIA

CONSELLERÍA DE PRESIDENCIA,
XUSTIZA E DEPORTES



Para a súa tramitación polo Parlamento de Galicia achégolle o **"Proxecto de lei de modificación da lei 8/2008, do 10 de xullo, de Saúde de Galicia, pola que se establecen medidas de prevención e protección integral contra a violencia no sistema de saúde de Galicia"**, aprobado polo Consello da Xunta de Galicia na súa reunión do día 11 de novembro de 2025.

Asemade achégase a certificación expedida polo secretario do Consello co visto e prace do Sr. Presidente da Xunta de Galicia, así como os documentos aos que se refire o artigo 111 do Regulamento da Cámara (en papel e en pendrive).

Santiago de Compostela,

A directora xeral de Relacións Institucionais e Parlamentarias,

(ASINADO DIXITALMENTE)

Sr. presidente do Parlamento de Galicia



Asinado dixitalmente por:

REXISTRO ELECTRÓNICO na data 21/11/2025 10:21:31



PARLAMENTO DE GALICIA
REXISTRO XERAL ENTRADA
Data asento: 21/11/2025 10:21:42
Nº Rexistro: 39099
Data envío: 21/11/2025 10:21:42.441

CSV: BOPGDSPG-zpXLRTjpy-3
Verificación:
<https://sede.parlamentodegalicia.gal/tramites/csv/>





XUNTA
DE GALICIA

DIEGO CALVO POUSO, CONSELLEIRO DE PRESIDENCIA, XUSTIZA E DEPORTES
E SECRETARIO DO CONSELLO DA XUNTA DE GALICIA,

CERTIFICA:

Que o Consello da Xunta de Galicia na súa reunión do día once de novembro
de dous mil vinte e cinco adoptou, entre outros, o seguinte Acordo:

*"Aprobar o Proxecto de lei de modificación da Lei 8/2008, do 10 de xullo, de
Saúde de Galicia, pola que se establecen medidas de prevención e protección
integral contra a violencia no sistema de saúde de Galicia e a súa remisión ao
Parlamento de Galicia".*

E para que conste, asina a presente co visto e prace do Sr. Presidente, en
Santiago de Compostela a once de novembro de dous mil vinte e cinco.

Vº. e Prace
O PRESIDENTE



**PROXECTO DE LEI DE MODIFICACIÓN DA LEI 8/2008, DO 10 DE XULLO, DE SAÚDE DE
GALICIA, POLA QUE SE ESTABLECEN MEDIDAS DE PREVENCIÓN E PROTECCIÓN
INTEGRAL CONTRA A VIOLENCIA NO SISTEMA DE SAÚDE DE GALICIA**



EXPOSICIÓN DE MOTIVOS

I

A violencia no lugar de traballo é recoñecida pola Organización Internacional do Traballo (OIT) como un perigo ocupacional, prevalente en certas profesións, que debe de ser previsto e evitado, adoptando as correspondentes medidas de precaución.

A propia OIT e a Axencia Europea para a Seguridade e Saúde no Traballo recoñecen que os/as profesionais do ámbito sanitario están especialmente expostos/as a sufrir agresións e situacións de violencia, o que obriga a centrar cada día máis a atención dos poderes públicos.

Os/as profesionais son o principal activo do Sistema de Saúde de Galicia e, porén, están a sufrir agresións de diferente índole no exercicio da súa actividade laboral. Situacións violentas que os/as poñen en risco e poden provocar efectos nocivos tanto na seguridade e na saúde da persoa afectada coma no funcionamento do sistema sanitario no seu conxunto.

Proba disto é que, segundo datos extraídos dos sistemas de información dos que dispón a Administración sanitaria de Galicia, no ano 2024, o número de profesionais do Servizo Galego de Saúde que comunicaron algún tipo de violencia ascendeu a un total de 856, das cales 516 foron agresións verbais ou xestuais, e 340 comportaron violencia física.

No mesmo intervalo temporal, atendendo ao nivel asistencial no que se teñen producido ditos actos, resulta que na Atención Primaria e extrahospitalaria detectáronse 511 actos de violencia, e no nivel de Atención Hospitalaria contabilizáronse 345 deses actos.

As agresións físicas ou verbais aos/as profesionais, no exercicio das súas funcións, por parte de pacientes, familiares ou acompañantes rompen o vínculo de confianza que debe existir no desenvolvemento das funcións de carácter sanitario e supoñen un motivo de preocupación para os/as profesionais e por ende para todo o Sistema de Saúde de Galicia.

Malia que a reforma operada no Código Penal, no que atinxe ao tipo penal do delito de atentado respecto aos suxeitos pasivos do mesmo, equiparou aos/as funcionarios/as públicos/as como autoridade pública, coa consecuencia de que as persoas agresoras enfronten penas de cárcere máis duras e maiores indemnizacións, o problema da violencia no entorno sanitario segue a presentar unha tendencia crecente.



II

O problema descrito ten carácter sistémico, como o proba o feito de que no pleno da Comisión de Recursos Humanos do Sistema Nacional de Saúde do 26 de xullo de 2017 acordouse a creación dun grupo de traballo que elaborase as bases dun sistema de información de agresións a profesionais do Sistema, e en maio de 2018 constituíuse un grupo de traballo específico, dada a inexistencia dun sistema de información previo que recopilara de forma homoxénea os datos das agresións notificadas nos distintos servizos sanitarios, e elaborouse un documento consensuado que integraba un conxunto mínimo de datos (CMD) de agresións a profesionais no ámbito sanitario, con base nos datos achegados polas Comunidades Autónomas e INGESA.

Durante o ano 2023, estableceuse un subgrupo de traballo dedicado á análise e valoración de modificacións no conxunto mínimo de datos (CMD) xa existente. Como resultado da iniciativa introducíronse novos parámetros no CMD para facilitar a recompilación de información. As modificacións propostas, así como as actualizacións nalgúns parámetros consideráronse adecuadas no conxunto do grupo de traballo a comezos de 2024 e posteriormente foron presentadas ante a Comisión Técnica Delegada da Comisión de Recursos Humanos do Sistema Nacional de Saúde na súa sesión do día 26 de febreiro de 2024. Está previsto que este cambio no CMD se implemente a partires deste ano 2025.

Pero máis alá do cómputo de datos, existe unha realidade que afecta negativamente ao desempeño profesional, e que precisa de medidas concretas de carácter inmediato para reverter a tendencia alcista das agresións e dar a necesaria protección aos principais activos do Sistema de Saúde de Galicia.

Na nosa comunidade, a violencia da que é vítima o persoal do Sistema Público de Saúde de Galicia deu lugar a que nos últimos anos se deseñasen protocolos e se implementasen distintas medidas para atallar estas situacións, pero o certo é que dende a pandemia producíronse cambios sociais que requiren da actualización destas medidas e a ampliación de accións, con especial fincapé, nas de carácter preventivo.

De conformidade co artigo 4 da Lei 31/1995, de 8 de novembro, de Prevención de Riscos Laborais, enténdese por «prevención» o conxunto de actividades ou medidas adoptadas ou previstas en todas as fases de actividade co fin de evitar ou diminuír os riscos derivados do traballo, considerándose como tales as enfermidades, patoloxías ou lesións sufridas con motivo ou ocasión do traballo.

Así mesmo, o artigo 5 da citada lei establece como obxectivos da prevención a promoción da mellora das condicións de traballo dirixida a elevar o nivel de protección da seguridade e a saúde das persoas traballadoras, recoñecendo no seu artigo 14 o dereito a unha protección eficaz en materia de seguridade e saúde.

A tal efecto, o artigo 15 da Lei 31/1995, do 8 de novembro, establece os principios da



acción preventiva, entre os que se atopan evitar os riscos, avaliar os que non se poidan evitar, combatelos na súa orixe, planificar a prevención tendo en conta o estado da técnica, a organización do traballo ou as relacións sociais, entre outros.



III

Por tanto, cómpre implementar medidas concretas para impulsar un cambio na tendencia actual, o que pasa pola realización das modificacións lexislativas necesarias, e que de seguido se describen.

A presente lei consta dun artigo único, con dezaseis apartados para abordar as modificacións que se indican.

Así, a primeira modificación afecta ao artigo 3 do Título Preliminar, e consiste en incorporar aos efectos da dita lei que se entende por "violencia no ámbito sanitario" e "profesional do ámbito sanitario". Neste senso, a Comunidade Autónoma de Galicia, coñecedora da realidade da violencia neste ámbito e no seu firme compromiso de impedir tales actuacións e protexer aos/as profesionais no desenvolvemento da súa actividade, considera fundamental estender as medidas de prevención e protección fronte a tales actos de violencia a todo o sistema sanitario de Galicia, con independencia da titularidade pública ou privada do centro de prestación de servizos, así como a todos/as os/as profesionais que realizan actividade sanitaria de carácter asistencial ou calquera outra que sen ser estritamente asistencial garde relación coa dita actividade, como o transporte sanitario, entre outras. Asemade, prevese tamén neste mesmo apartado que a representación e defensa por parte dos letrados da Xunta, do persoal sanitario que teña sufrido actos de violencia sanitaria, nos casos en que proceda, rexerese polo disposto na Lei 4/2016, do 4 de abril, de ordenación da asistencia xurídica da Administración Xeral da Comunidade Autónoma de Galicia e do seu sector público.

Modifícase tamén o artigo 15 (Capítulo III do Título I) para reflectir dentro dos deberes da cidadanía, ademais do xenérico deber de respecto ao persoal que presta os seus servizos no Sistema de Saúde de Galicia, o deber de respecto da súa honra e prestixio profesional. En correlación a ese deber, establécese o seu incumprimento como infracción sanitaria. Tamén se fai referencia á importancia da relación de confianza que debe existir entre o persoal sanitario que desenvolve funcións asistenciais e os/as pacientes, e o xeito en que certas condutas como a gravación e difusión a terceiros do contido desa relación, sen consentimento ou mesmo contra a vontade expresa do/da profesional, poden ter consecuencias para as dúas partes, tanto desde o punto de vista deontolóxico como administrativo.

Engádese un artigo 39.ter, que fai referencia expresa e regula as implicacións e consecuencias que, para os procedementos e actuacións administrativas, terá a concorrencia destas respecto das actuacións iniciadas polos mesmos feitos na vía penal.

Por outra banda, modifícase o Capítulo IV do Título II, relativo ás infraccións e sancións. A redacción actual da lei trata conxuntamente condutas que deben ter distinto tratamento, como son a coacción ou a ameaza, que teñen o mesmo tratamento que a agresión ou calquera forma de violencia exercida sobre os profesionais ou as profesionais no exercicio



das súas funcións. Para tal efecto, outórgase carácter diferenciado ás infraccións cometidas en materia de violencia no ámbito sanitario e a tal fin recóllense diferentes condutas que son tipificadas como infracción leve, grave e moi grave, segundo o caso, cun artigo con entidade propia para cada un dos tipos e unha gradación das sancións en función da gravidade dos feitos.

Así, a modificación pretende dar un tratamento específico e diferenciado para as agresións e demais actitudes violentas, de xeito que se individualicen, tipifiquen e sancionen en función da súa gravidade, coa posibilidade de adopción de sancións accesorias e medidas provisionais específicas, mais acaídas para este tipo de infraccións. Asemade, e consonte o preceptuado no artigo 28.2 da Lei 40/2015, do 1 de outubro, do Procedemento Administrativo Común das Administracións Públicas, prevese tamén de xeito expreso a posibilidade de que o órgano ao que corresponda o exercicio da potestade sancionadora esixa á persoa infractora a reposición da situación alterada ao seu estado orixinal, ademais da correspondente indemnización polos danos e prexuízos causados, o que se traducirá nestes casos na obriga de facerse cargo dos gastos de asistencia sanitaria da vítima e, no seu caso, dos danos causados pola súa conduta infractora no mobiliario, instalacións ou equipamento do centro sanitario, ou nos enseres ou efectos persoais da vítima.

Así mesmo, modifícase o capítulo X do Título II, relativo ao contrato de servizos sanitarios, para incorporar no apartado sexto do artigo 74 a posibilidade da existencia de subscripción polo/a empregador/a dun seguro que garanta a defensa xurídica e o resarcimento dos danos derivados dos actos de violencia sufridos polo persoal que presta servizos para o Sistema Público de Saúde de Galicia a través dun contrato de servizos sanitarios, así como dispor dun plan de prevención e de formación en materia de violencia no ámbito sanitario en termos equivalentes aos esixidos para o Servizo Galego de Saúde.

Tamén se aborda a modificación dos Capítulos III ("selección, provisión e promoción interna") e VI ("saúde laboral") do Título VIII, para garantir a mobilidade do persoal vítima de violencia no ámbito sanitario así como para introducir a figura do Plan de Prevención contra a Violencia no ámbito sanitario, o cal efectuará unha previa avaliación integral do risco de danos por violencia en función de factores relevantes en cada centro, de cara á adopción das medidas específicas que sexa preciso implantar, e obrigará a facilitar formación e información na materia.

Engádesse un novo parágrafo ao artigo 119 (saúde laboral) para recoller a posta a disposición do persoal vítima dun acto de violencia dos servizos específicos encargados de prestar o apoio psicolóxico que en cada caso se precise, así como de tramitar as denuncias que puideran presentarse. Tamén se lle facilitará asesoramento a través da Asesoría Xurídica da Xunta de Galicia, das accións e denuncias que cabe interpoñer.

Engádesse un artigo 119.bis relativo ao Plan Galego de Prevención contra a Violencia no ámbito sanitario, como instrumento para garantir o dereito de todos/as os/as profesionais a recibir asistencia e protección das Administracións públicas e servizos de saúde no



exercicio da súa profesión ou no desempeño das súas funcións, de conformidade co previsto no artigo 17.h) da Lei 55/2003, do 16 de decembro, do Estatuto Marco do Persoal Estatutario dos Servizos de Saúde, e que será de aplicación en todos os centros asistenciais do Sistema Público de Saúde de Galicia e nos seus entes instrumentais vinculados.

Asemade se prevé a creación dun Rexistro Galego de Actos de Violencia Externa no ámbito sanitario, no que se inscribirán e rexistrarán todos os actos de violencia que resulten sancionados.

A tal efecto engádese un artigo 119.ter no que se crea este rexistro.

Por outra banda, modifícase o Capítulo I do Título IX ("Docencia e Formación") para os efectos de introducir medidas de formación específica ao persoal do Sistema Público de Saúde de Galicia, similares ás xa existentes sobre coñecementos e habilidades sanitarias e igualdade (previstas xa no número 3 do artigo 125 da lei), e que teñan por obxecto situacións de emerxencia provocadas por pacientes con condutas violentas, a abordaxe de condutas desafiante para o manexo de situacións, así como para coñecer os mecanismos e técnicas de autocontrol ante agresións físicas e técnicas de pausado e control da situación.

A tal fin, engádese un artigo 125.bis relativo á implantación de medidas específicas de formación e capacitación en materia de prevención da violencia no ámbito sanitario.

Completan o texto unha disposición adicional, relativa á realización de campañas de sensibilización social; unha disposición derogatoria; unha disposición transitoria para o mantemento da vixencia das medidas de prevención adoptadas; e dúas disposicións derradeiras, relativas ao desenvolvemento regulamentario e á entrada en vigor.



Artigo único. *Modificación da Lei 8/2008, do 10 de xullo, de saúde de Galicia*

A Lei 8/2008, do 10 de xullo, de saúde de Galicia, queda modificada como segue:

Un. Engádesse o número 23 ao artigo 3, coa seguinte redacción:

23) Violencia no ámbito sanitario: violencia física, verbal ou dixital, exercida por pacientes, familiares ou acompañantes contra os/as profesionais do ámbito sanitario durante o exercicio das súas funcións ou con ocasión delas.

Para estes efectos, terá a condición de profesional do ámbito sanitario aquel que realiza actividade sanitaria de carácter asistencial, de administración, admisión, traslado de pacientes así como calquera outra que sen ser estritamente asistencial garde relación coa dita actividade, en centros sanitarios, domicilio da persoa usuaria, dispositivos de transporte sanitario ou de atención sanitaria urxente, así como o persoal con funcións de inspección de servizos sanitarios.

A representación e defensa por parte dos letrados da Xunta do persoal sanitario que teña sufrido actos de violencia sanitaria consonte ao disposto nesta lei, nos casos en que proceda, axustarase ao disposto na Lei 4/2016, do 4 de abril, de ordenación da asistencia xurídica da Administración Xeral da Comunidade Autónoma de Galicia e do seu sector público.

Dous. O número 2 do artigo 15 queda coa seguinte redacción:

"2. Manter o debido respecto ao persoal que presta os seus servizos no Sistema de Saúde de Galicia, así como á súa honra e prestixio profesional, absténdose de realizar actos que poidan supoñer lesión ou menoscabo da súa seguridade e integridade física e moral, ou da relación de confianza no desempeño das súas funcións. Para estes efectos, a gravación sen consentimento ou coa oposición expresa dos/das profesionais que desenvolvan as súas funcións asistenciais, así como a difusión das gravacións efectuadas durante a actuación profesional, entenderase como unha creba daquela relación de confianza, polo que o persoal atinxido poderá suspender a asistencia deixando constancia diso na historia clínica, quedando garantida en todo caso a atención sanitaria da persoa usuaria."

Tres. Engádesse un número 3 ao artigo 39.bis, coa seguinte redacción:

"3. Con independencia das sancións que lles sexan impostas, os suxeitos responsables da comisión de infraccións en materia de violencia no ámbito sanitario quedan obrigados a repoñer as cousas ao seu estado anterior. Nestes casos, o órgano ao que corresponda o exercicio da potestade sancionadora exixiralles o aboamento dos gastos de asistencia sanitaria da vítima así como os que cubran a reparación dos danos causados pola súa conduta infractora no mobiliario, instalacións ou equipamento do centro sanitario, así como a reparación dos danos materiais causados nos enseres ou efectos persoais da



vítima.

Catro. Engádese un artigo 39.ter, coa seguinte redacción:

"Artigo 39.ter. *Concorrenza co proceso penal*

1. Se a persoa instrutora, en calquera momento do procedemento, considera que os feitos sobre os que instrúe poden ser constitutivos de ilícito penal, poñerá en coñecemento do órgano competente para resolver, o cal, se estima razoable a consideración da persoa instrutora, porá ditos feitos en coñecemento do Ministerio Fiscal, solicitándolle testemuño sobre as actuacións practicadas respecto da comunicación.

Igualmente solicitarase ao Ministerio Fiscal comunicación sobre as actuacións practicadas cando se teña coñecemento de que se está a seguir un proceso penal sobre os feitos aos que se refire o procedemento administrativo. A mesma comunicación solicitarase cando o proceso penal se siga sobre feitos que sexan resultado ou consecuencia dos feitos aos que se refire o procedemento administrativo.

2. Nos casos previstos no apartado anterior, cando para a resolución do procedemento sexa indispensable a obtención do previo pronunciamento por parte do órgano xurisdiccional penal, o transcurso do prazo máximo legal para resolver o procedemento e notificar a resolución poderase suspender desde o momento no que se solicite ao Ministerio Fiscal o testemuño sobre as actuacións practicadas, o que se notificará ás persoas interesadas, ata que a Administración teña constancia do arquivo por parte do Ministerio Fiscal ou do pronunciamento que corresponda por parte do órgano xurisdiccional competente, o que tamén lles será notificado. En todo caso, recibida a comunicación do Ministerio Fiscal que confirme a existencia de actuacións ante a xurisdición penal, o órgano competente para resolver o procedemento sancionador acordará a súa suspensión ata que recaia resolución xudicial firme.

3. A suspensión do procedemento administrativo sancionador non impide o mantemento das medidas cautelares adoptadas, sempre e cando resulten compatibles coas acordadas no proceso penal. Non se entenderán compatibles se as medidas cautelares penais son suficientes para o logro dos obxectivos cautelares considerados no procedemento administrativo sancionador.

O acto polo que se manteñan ou adopten as medidas cautelares deberá ser comunicado ao Ministerio Fiscal.

4. En todo caso, os feitos declarados probados por resolución xudicial penal firme vinculan aos órganos administrativos respecto dos procedementos sancionadores que se tramiten.

A) Administración revisará de oficio as resolucións administrativas fundadas en feitos



contraditorios cos declarados probados na resolución penal, de acordo coas normas que regulan os procedementos de revisión de oficio.”

Cinco. Engádese un artigo 41.ter, coa seguinte redacción:

“Artigo 41.ter. Infraccións leves en materia de violencia no ámbito sanitario

Tipifícanse como infraccións leves en materia de violencia no ámbito sanitario as seguintes:

- a) A falta de respecto ou o insulto ás autoridades sanitarias e os seus axentes e aos/ás profesionais aos/ás que se refire o segundo parágrafo do número 23 do artigo 3, así como a creba da relación de confianza durante o exercicio das súas funcións ou con ocasión destas, cando non constitúan infracción grave ou moi grave, sen prexuízo das consecuencias ou efectos procedentes desde o punto de vista penal e deontolóxico.
- b) A realización de actos ou condutas que alteren ou perturbem o normal desenvolvemento da actividade asistencial ou o funcionamento ordinario dos centros sanitarios, cando non constitúan infracción grave ou moi grave.
- c) A destrución, menoscabo ou deterioración das instalacións e equipamentos dos centros sanitarios ou dos medios de transporte sanitario, sempre que non afecten ao funcionamento ordinario do centro ou ao normal desenvolvemento da actividade asistencial.

Seis. Engádese un artigo 42.ter, coa seguinte redacción:

“Artigo 42.ter. Infraccións graves en materia de violencia no ámbito sanitario

Tipifícanse como infraccións graves en materia de violencia no ámbito sanitario as seguintes:

- a) A resistencia, ameazas, coacción, acoso dixital ou ciberacoso e represalias ás autoridades sanitarias ou os seus axentes e aos/ás profesionais aos que se refire o segundo parágrafo do número 23 do artigo 3, durante o exercicio das súas funcións ou con ocasión destas.
- b) A destrución, menoscabo ou deterioración das instalacións e equipamentos dos centros sanitarios ou dos medios de transporte sanitario, sempre que afecte ao seu normal funcionamento.
- c) Calquera outra forma de presión exercida contra as autoridades sanitarias e aos/ás profesionais aos que se refire o segundo parágrafo do número 23 do artigo 3, cando non constitúa infracción moi grave.



d) A reincidencia na comisión de infraccións leves nos últimos doce meses.

Sete. Engádesse un artigo 43.ter,coa seguinte redacción:

"Artigo 43.ter. Infraccións moi graves en materia de violencia no ámbito sanitario"

Tipifícanse como infraccións moi graves en materia de violencia no ámbito sanitario as seguintes:

a) A agresión física ás autoridades sanitarias ou os seus axentes e aos/ás profesionais aos que se refire o segundo parágrafo do número 23 do artigo 3, durante o exercicio das súas funcións ou con ocasión destas.

b) A reincidencia na comisión de infraccións graves nos últimos cinco anos.

Oito. Engádesse un artigo 44.ter coa seguinte redacción:

"Artigo 44.ter. Sancións en materia de violencia no ámbito sanitario"

1. As infraccións en materia de violencia no ámbito sanitario serán sancionadas gardando a debida adecuación entre a gravidade do feito constitutivo da infracción e a sanción aplicada, e establecerase unha gradación desta en grao mínimo, medio e máximo para cada nivel de cualificación. Para a determinación da sanción que se vai impoñer, dentro de cada un destes graos, deberase atender aos criterios establecidos no artigo 29.3 da Lei 40/2015, do 1 de outubro, así como ao incumprimento das advertencias previas, ao número de persoas postas en risco ou afectadas, especialmente se se trata de colectivos vulnerables, e á gravidade da alteración sanitaria producida.

2. As infraccións tipificadas nos artigos 41 ter, 42 ter e 43 ter serán sancionadas con multas, conforme a gradación seguinte:

a) Infraccións leves:

1º) Grao mínimo: de 300 a 500 euros.

2º) Grao medio: de 501 a 1.000 euros.

3º) Grao máximo: de 1.001 a 1.500 euros.

b) Infraccións graves:

1º) Grao mínimo: de 1.501 a 2.000 euros.



2º) Grao medio: de 2.001 a 2.500 euros.

3º) Grao máximo: de 2.501 a 3.000 euros.

c) Infraccións moi graves:

1º) Grao mínimo: de 3.001 a 7.000 euros.

2º) Grao medio: de 7.001 a 12.000 euros.

3º) Grao máximo: de 12.001 a 15.000 euros.

3. A autoridade competente para resolver o expediente poderá acordar así mesmo, como sancións accesorias nos supostos de infracción grave ou moi grave cometida no ámbito do Sistema Público de Saúde de Galicia, a asignación doutro/a profesional sanitario distinto á persoa infractora e/ou a súa adscrición a un centro sanitario distinto da mesma localidade, por un prazo non superior a cinco anos."

Nove. Engádese un artigo 45.ter coa seguinte redacción:

"Artigo 45.ter. Competencia para sancionar as infraccións en materia de violencia no ámbito sanitario

Os órganos autonómicos competentes para o exercicio da potestade sancionadora pola comisión de infraccións en materia de violencia no ámbito sanitario tipificadas nesta lei son:

a) A persoa titular da Dirección Territorial da consellería competente en materia de sanidade que corresponda por razón do ámbito territorial da comisión da infracción, cando se trate de infraccións leves.

b) A persoa titular da Secretaría Xeral Técnica da consellería competente en materia de sanidade, cando se trate de infraccións graves.

c) A persoa titular da consellería competente en materia de sanidade cando se trate de infraccións moi graves."

Dez. Modifícase o número 2 do artigo 46.ter, que queda redactado como segue:

"2. As medidas provisionais deberán ser proporcionadas á natureza e gravidade das infraccións cometidas, e poderán consistir nalgunha das previstas no artigo 46 ou en calquera outra que asegure a eficacia da resolución que se poida ditar, así como na asignación doutro/a profesional sanitario/a distinto á persoa infractora, no caso das infraccións cometidas en materia de violencia no ámbito sanitario. Non se poderán adoptar medidas provisionais que poidan causar prexuízo de difícil ou imposible



reparación ás persoas interesadas ou que impliquen violación de dereitos amparados polas leis."

Once. Modifícase o número 6 do artigo 74, que queda redactado como segue:

"6. Os servizos e actividades sanitarias ou asistenciais que o Sistema Público de Saúde de Galicia contrate co sector privado de asistencia sanitaria haberán de axustarse aos mesmos parámetros, estándares, dereitos ou criterios de actuación exigibles para os do propio Sistema Público de Saúde de Galicia. A tal efecto, os pregos de licitación incorporarán a obriga para a empresa contratista de dispor dun plan de prevención e de formación en materia de violencia no ámbito sanitario en termos equivalentes aos esixidos para o Servizo Galego de Saúde.

Así mesmo, a Administración poderá exixir ao empregador a suscripción dun seguro que garanta ao persoal vítima dun acto de violencia no ámbito sanitario a cobertura da asistencia xurídica e o resarcimento económico dos prexuízos derivados daquel."

Doce. Modifícase o número 10 do artigo 115, que queda redactado como de seguido se indica:

"10. A administración establecerá medidas de mobilidade do persoal, tendentes á protección das vítimas de violencia de xénero e violencia no ámbito sanitario e a favorecer a conciliación da vida persoal e familiar e a protección da saúde laboral. Para tal efecto, poderán subscribirse convenios de colaboración con outras administracións públicas."

Trece. Modifícase o artigo 119, que queda redactado como segue:

"Artigo 119. *Saúde laboral*

A Administración sanitaria, no marco da lexislación xeral en materia de saúde laboral e prevención de riscos laborais, adoptará as medidas oportunas para a protección da saúde dos traballadores e traballadoras do sector sanitario público a través de órganos dedicados en exclusiva a esta función. Estableceranse medidas de coordinación que obriguen a participar ás unidades dos centros e órganos cando en razón á materia teña relevancia a súa cooperación na protección da saúde laboral e a prevención de riscos laborais no sector.

O Servizo Galego de Saúde porá a disposición do persoal vítima dun acto de violencia no ámbito sanitario, un servizo específico encargado de prestar o apoio psicolóxico que en cada caso se precise. Tamén porá a disposición un servizo encargado de tramitar as denuncias que puideran presentarse con ocasión dun acto de violencia no ámbito sanitario."

Catorce. Engádese un novo artigo 119.bis coa seguinte redacción:





"Artigo 119.bis. Plan Galego de Prevención contra a Violencia no ámbito sanitario"

1. O Plan Galego de Prevención contra a Violencia no ámbito sanitario constitúe o instrumento para garantir o dereito de todos/as os/as profesionais a recibir asistencia e protección das Administracións públicas e servizos de saúde no exercicio da súa profesión ou no desempeño das súas funcións, de conformidade co previsto no artigo 17.h) da Lei 55/2003, do 16 de decembro, do Estatuto Marco do Persoal Estatutario dos Servizos de Saúde.

O Plan será de aplicación en todos os centros asistenciais do Sistema Público de Saúde de Galicia e nos seus entes instrumentais vinculados.

2. O Plan será elaborado polo órgano directivo do Servizo Galego de Saúde con competencias en materia de saúde laboral, e deberá ser obxecto de negociación na correspondente mesa de negociación colectiva.

3. O Plan Galego de Prevención contra a Violencia no ámbito sanitario terá o seguinte contido mínimo:

a) Medidas de prevención, nas cales se incluírán, como mínimo, as seguintes:

1º. Actuacións dirixidas ás persoas usuarias do Sistema Público de Saúde de Galicia.

2º. Condicións de seguridade dos lugares de traballo. Para tal efecto, a avaliación de riscos dos postos de traballo deberá conter a valoración do risco de violencia.

3º. Medidas de formación e capacitación do persoal.

4º. Medidas organizativas dirixidas a evitar as situacións de violencia no ámbito sanitario e atenuar os seus efectos.

b) Procedemento de actuación fronte a unha agresión.

c) Accións dirixidas contra a persoa agresora.

d) Plan de comunicación.

e) Avaliación e seguimento.

4. O Plan Galego de Prevención contra a Violencia no ámbito sanitario garantirá de maneira específica a protección do persoal do ámbito sanitario que, por razón de sexo, ou polas súas características persoais, físicas ou situación de discapacidade, sexa especialmente propicio a sufrir un acto de violencia.

Así mesmo, adoptará as medidas específicas en beneficio daqueles/as traballadores/as que, por razón das súas condicións de traballo, ou do servizo ou unidade ao que se atopen adscritos, estean expostos/as a maior risco de sufrir un dano por violencia no ámbito sanitario.

5. O Plan será aprobado polo Consello da Xunta, a proposta da consellería competente en materia de sanidade, e producirá efectos a partires da súa publicación no *Diario Oficial de*



Galicia. Asemade, será tamén obxecto de publicación no Portal de Transparencia e Goberno Aberto da Xunta de Galicia.

6. O Plan será revisado anualmente, de conformidade cos datos e evidencias recollidas no seu seguimento e aplicación."

Quince. Engádesse un novo artigo 119.ter coa seguinte redacción:

"Artigo 119.ter. Rexistro Galego de Actos de Violencia Externa no ámbito sanitario

1. Créase o Rexistro Galego de Actos de Violencia Externa no ámbito sanitario, no que o órgano competente para sancionar inscribirá e rexistrará todos os actos de violencia que resultasen sancionados.

2. A información que no mesmo se conteña non terá carácter público, e unicamente se utilizará por parte dos órganos competentes para as finalidades previstas no eido da prevención e protección da violencia no ámbito sanitario.

3. O rexistro será único para todo o Sistema de Saúde de Galicia, e permitirá obter información desagregada dos seus indicadores por sexo. Regulamentariamente determinaranse o seu funcionamento e órgano de adscrición.

4. O rexistro poderá ser empregado con fins estatísticos, de acordo coa Lei 6/2024, do 27 de decembro, de estatística de Galicia.


Dezaseis. Engádesse un novo artigo 125.bis coa seguinte redacción:

"Artigo 125.bis. Medidas de formación e capacitación en materia de prevención da violencia no ámbito sanitario

1. De conformidade co previsto no número 3 do artigo 119.bis, o Plan Galego de Prevención contra a Violencia no ámbito sanitario conterá medidas de formación e capacitación do persoal, como elemento preventivo que facilite ao persoal o manexo de recursos e habilidades para enfrontar aquelas situacións de violencia que se susciten con ocasión do seu exercicio profesional.

2. A tal efecto, correspóndelle á Axencia Galega para a Xestión do Coñecemento en Saúde a xestión da formación no Sistema Público de Saúde de Galicia, de conformidade co artigo 2 dos seus estatutos, aprobados por Decreto 112/2015, do 31 de xullo, polo que se crea a Axencia e se aproban os seus estatutos.

3. Para tal efecto, as medidas de formación e capacitación incluírán, como mínimo, os seguintes aspectos:



- a) Elaboración e actualización do material informativo dirixido a profesionais, sobre as recomendacións e pautas de actuación ante situacións conflitivas e agresións.
 - b) Organización de actividades e iniciativas específicas de formación online sobre prevención de agresións, dirixidas a todo o persoal empregado público da saúde do Sistema Público de Saúde de Galicia, así como sobre técnicas para o manexo de situacións conflitivas e sobre os procedementos para o apoio, asesoramento e asistencia á persoa agredida.
 - c) Elaboración de material audiovisual sobre xestión de situacións conflitivas.
 - d) Realización de cursos e obradoiros prácticos nos centros de traballo, priorizando servizos, unidades, centros ou grupos profesionais de maior risco, sobre habilidades comunicativas, xestión de situacións conflitivas e control de pacientes agresivos. Estes cursos incluíranse anualmente na programación anual das actividades preventivas do Servizo Galego de Saúde.
 - e) Realización de actividades formativas conxuntas con interlocutores policiais e sanitarios.
 - f) Inclusión de recomendacións, guías e/ou protocolos de actuación ante agresións, en todas as actividades formativas xerais de prevención de riscos laborais e nas xornadas de acoillida de novas incorporacións. Igualmente, incluírase esta materia nos cursos de xestión da prevención dirixidos a mandos intermedios e persoal directivo.
4. As persoas que accedan á condición de persoal estatutario fixo do Servizo Galego de Saúde, logo da superación dun proceso selectivo, deberán realizar, con carácter obrigatorio, dentro dos seis meses posteriores á toma de posesión do destino adxudicado, unha actividade formativa básica sobre medidas preventivas e protección contra a violencia no ámbito sanitario, que organizará a Axencia Galega para a Xestión do Coñecemento en Saúde.
5. A formación en materia de violencia no ámbito sanitario computará, como mérito, nos procesos de selección e provisión de prazas que convoque o Sistema Público de Saúde de Galicia, así como para o acceso aos distintos graos de carreira profesional."



Disposición adicional única. *Campañas de sensibilización social*

1. A consellería competente en materia de sanidade realizará campañas dirixidas á poboación xeral, a fin de aumentar a sensibilización e o respecto ao papel dos/das profesionais a que se refire o número 23 do artigo 3.
2. As campañas de sensibilización social terán carácter bianual, agás que os actos probados de violencia no ámbito sanitario aconsellen a realización de campañas cunha maior frecuencia.





Disposición derogatoria única. *Derrogación normativa*

Quedan derogadas cantas disposicións de igual ou inferior rango se opoñan ao disposto na presente lei.



Disposición transitoria única. *Vixencia das medidas de prevención adoptadas*

As medidas de prevención contra a violencia no ámbito sanitario vixentes á entrada en vigor desta lei manteranse transitoriamente ata a implantación das medidas adoptadas ao abeiro desta lei.





Disposición derradeira primeira. *Desenvolvemento regulamentario*


Autorízase ao Consello da Xunta para que aprobe os regulamentos que sexan necesarios para a aplicación e desenvolvemento desta lei.






Disposición derradeira segunda. *Entrada en vigor*

Esta lei entrará en vigor o día seguinte ao da súa publicación no *Diario Oficial de Galicia*.


Diego Calvo Poliso

Conselleiro de Presidencia, Xustiza e Deportes





PARLAMENTO
DE GALICIA

BOLETÍN OFICIAL DO **PARLAMENTO DE GALICIA**

Edición e subscricións:

Servizo de Publicacións do Parlamento de Galicia. Hórreo, 63. 15702. Santiago de Compostela.

Telf. 981 55 13 00. Fax. 981 55 14 25

Dep. Leg. C-155-1982. ISSN 1133-2727

